

APRIL 2025

VOLUME 65 • NO. 04



# Khristian Thukizakna



13

Palm Sunday



18

Good Friday



20

Easter Sunday

MARCH THUPI

## Kihehpihtuahna lampi a pai Gingtu

MARK 2:1-5; LUKE 10:25-37; NASEPTE 16:25-34; JAKOB 2:14-17; MATTHAI 25:37-40

13 PALM SUNDAY

18 GOOD FRIDAY

20 EASTER SUNDAY

**EDITORIAL BOARD**

**Editor**

Rev. K. Kamchinkhup

**Managing Editor**

Rev. M. Zalian Guite

**Contributing Editors**

Rev. Thawndoulian

Rev. Nenglian Vualnam

**Production Managers**

Rev. Chinkhengoupau Buansing

Upa T. Paukhansiam

Mr. Mangthianlal Samte

**Circulation Manager**

Upa K. Jamchinthang

C/No. +91 8837208598

**Design & Setting**

Upa Khuplajem Guite

Mr. Chinsuanlal

**CONTENTS**

|  |      |
|--|------|
| 1. EDITORIAL                             | : 1  |
| 2. KIHEHPHIHTUAHNA LAMPI A PAI<br>GINGTU | : 3  |
| 3. PALM SUNDAY MESSAGE                   | : 6  |
| 4. GOOD FRIDAY MESSAGE                   | : 10 |
| 5. KHRIST THOHNAWNNA<br>POIMOHNA         | : 13 |
| 6. SOCIAL MEDIA ZAT MANPHAT<br>DING DAN  | : 17 |
| 7. BIBLE STUDY                           | : 21 |
| 8. GAMMIAL AW                            | : 26 |
| 9. DORCAS CORNER                         | : 30 |
| 10. YOUTH CORNER                         | : 31 |
| 11. EBC MUSIC                            | : 33 |
| 12. EBC INNSUNG THU                      | : 35 |
| 13. ORDAIN SUNNA                         | : 37 |
| 14. KIPAHHTU GENNA LEH<br>THUMNA DINGTE  | : 38 |

**LAKMAN:**

Kum khat ₹ 150.00

Dak ah ₹ 200.00

Bu khat ₹ 15.00

**Thusuah ding piakna:**

Editor,

Khristian Thukizakna

Dorcas Hall, P. O. Box - 6,

New Lamka,

Manipur - 795006, India.

*Thusuah sung-a kigente  
Evangelical Baptist Convention  
Saptuam ngaihndan a hikim kholkei.  
Thusuahte'n amau thusuah ah moh a  
pawtek ding uh.*

I kum thupi “I Lampite Enchian Ni” ahih dungzui in i lampite Enchian a, apoimoh bang a malakna neih ding i sawm dan ahi. Hiai bang a kalsuan ahihtheihna ding in, “Bang pansan a ki-enchian ding?” chih dotna i thupi ahihna bangtak a i paipih leh phattuampih theihna ding a aloutheilou ahi. Kha paisa a i gelh bang in Sawltak Paul in mihing ngaihtuahna bang a ettel a omna pen thil neuchik/neupen ahi a chi hi. Aman a ki-etchetna dia “Pathian hon tehna” leh “mohpuakna a hon piak bangzel in” a chih eite ki-chetna ding leng ahi hi.

Pathian hon tehna ding, mohpuakna ahon piak bang dungzui a Saptuamte ki-en ding hileng, bang ahi dia? Laisiangthou, Matthai 28:19,20 a i muh bang in Toupa Jesu Khrist “Nagotna Thupi” i chih i ki-etchetna ding poimoh pen ahi mai ding hi. I Saptuam mah in leng Kiphuhkhiakna Dan ah, i **ESV Vision Statement**, i tunsawmna ding, hiai bang thugelh i nei hi. *“Evangelical Baptist Convention in Khrist batna leh A thupiak Thupi zuihna a kilangkha, Pathian bekhawm pawlpi hih ding amengmuhna ahi.”* I tunsawmna pen etchet ahihtheihna ding in Toupa Thupiak Thupi zuihna a kilangkha ding chih ahi.

Toupa thupiak thupi, Mathai 28:19, 20 a i muh hiai ahi. “Huaiziak in, kuan unla, namchih apan nungzuite bawl unla, Pa, Tapa, leh Kha Siangthou min in baptist unla, Thu k'on piak tengteng zui ding in thuhilh un.” Hiai thupiak/nnagotna sung ah hih ding a kigen li(4) bang a om hi. Hiaite, “kuan” ding, “bawl” ding, “Baptist” ding leh “thuhilh” ding, chihte ahi. Hiaite lak ah, “kuan”, “Baptist” leh “thuhilh” chih thumalte, nungzui “bawl” ding a hih ding poimoh kigente ahi. Gendan dang ah gen leng, Jesu Khrist Thupiak/Nnagotna Thupi ahihle, “nungzuite bawl” ding ahi. Huai ding in “kuan” a Tanchinhoih gen, a gingtate “Baptist” leh “thuhilh” ding ahi. Hiai thil thumte kispna tungtawn a “nungzui bawl” ding pen ahi, Nnagotna Thupi.

I nasepnate i etchiang in, saptuam mite kipiakzohna ziak in, Pathian pina toh nna tampitak tualsung, division, headquarters leh field tan ah tha-it tak in i sem hi. Nagotna Thupi toh kisai ah leng, i sepkhawmnate ziak in gingthak baptistna piak a om, ban ah kisinsakna tuamtuam leng i hihsek hi. Kipahhuai mahmah. Himahleh, ki-etchetna ahih dungzui in, ki-en leng. Toupa'n nagotna thupi a, agen "nungzuite bawl" pen i deihthu samlou ahi chi leng, genkhial ding in a kigintakhuai kei hi.

Hiai pansan a ki-etchetna ding in, saptuam in Vision Statement a i na gelh leh Laisiangthou a kimu bang in, Khrist nungzui tak kilatkhiakna ding tuh "**Khrist batna**" ahi (Mt 20:24,25; Rom 8:29). Chialpi tungtawn a piangthak leh Baptisna tang leh Sunday school, biakna kikhopte leh kisinsakna tuamtuam a kithuhilhna a om tam tuk in Khrist batna neihna a kilangkhia Khrist nungzui i lak ah vang mahmah hi. Huai sang a khawkwaw ahi diam chih theih ding in, hiai bang tupmawng a nei a kalsuanna leh a kalsuan mi tawm mahmah i hih khak ding lauhuai hi. Huaiziak mah in, Dallas Willard in "The Great Omission" chih laibu na gelh hial hi. Nagotna Thupi sung ah agol mahmah nna i maihkhak ding lauhuai leh pilvanhuai mahmah hi.

Huaiziak in, Khrist Nungzuihna leh anungzui ding bawlna naksem a i sut a, hiai taksuah ahihtheihna ding a kisakna leh kalsuanna i neih uh poimoh mahmah hi. Huai ding in, saptuam heutu, Pastor, Uplate, semtute leh heutu tuamtuam in a lampi ding zong a, abaihlam a, atak a kalsuanna i neih uh kisam ahi. Term lui a i General Secretary, Rev Dr S. Vung Minthang in Kumsim Khawmpi 76na hun a agen bang in, i saptuam dinmun in niamlam a manoh khak ding venhuai hi. Huai ding a, curve (kuitou) nihna a om ding poimoh chi a kigen pen Toupa Nagotna Thupi zui a nungzuite bawlna ding a kalsuanna in nei thei leng chi in Toupa min in saptuamte i kichial hi! Nnagotna Thupi toh kizui in Thuchiam Thupi, "Khang hun tawp dong in na kiang uah ka om gige hi" chih Toupa Jesu Khrist in hon chiam ngal a! ■

# KIHEHPIHTUAHNA LAMPI A PAI GINGTU

- Rev. Dr. Luaichinthang

**K**ihehpihtuahna i chih bang ahia? Hehpih i chih chiang in deihsak, mi kuahiam tung a thilhoih tung ding a deihsak tuntun chihna ahi. Kuahiam tung a thilhoih tung ding a i deihsak tuntun aleh tuh, a tung a thilhoihlou a tun aleh pona mahmah chihna leng a genkha hi. I hehpihte tuh i itte ahizel uhi. I hehpihte tuh a tung uah thilhoih ngen tung henla, thilhoihlou bangmah tung ngei kei leh i chihhte ahi uhi. Kuahiam khat “Ka hehpih e!” i chihleh tuh, a tung a thiltung deihuailou tung a, huaipen thuakpih mahmah i hi i chihna ahi.

Leitung i khualzinna ah a nuam a haksa tampi i tawn ua, i sihma teng tuate tawntoutou lai ding i hi. Ka ngaihsutsut chiang in, mi khenkhat a haksa kia thuak ding a piang om a, khenkhat lah a nuam kia tuak ding a piang om a diam aw, ka chi dekzel a; himahleh, huchidan hilou a, a nuam leh a haksa thuakkha vek kihi ahi, chih ka mukhia hi. Huchikawm inleng, a haksa lam tam thuakkha deuh, a nuamlam tam tuakkha deuh chihzaw om hiin ka thei hi. Hiai tuh kei mimal muhdan ahi.

Huchihlai in, kua’n, kua hehpih ding? chih ngaihtuah tham ahi. Ahi dantak in tuh, a nuamlam tuakkhate’n a haksalam tuakte hehpih ding ahi. Himahleh, a nuam tuakte’n huchibang ahiam uh kiphawklou, mi, gentheih, haksat thuak tamtak

om ahiam theilou a, amau nuamtak a khosa hiuhiau maimah tamtak om uhi. Huaipen Toupa deihdan hilou hi.

Toupa’n bel, khat leh khat kihehpihtuah ding in hon deihi (Johan 13: 34-35). Hiai ah, “Na kiittuahna un mite’n ka nungzuite na hi uh chih ahon thei ding uh” a chi hi. Mite’n Kristiante ahon chiamtehna ding uh tuh, i kiittuahna uah ahiah ding ahi, Toupa Jesu’n chi hi. Kristiante gam tuam, nam tuam, pau tuam, tawndan tuamtuam i hi uh. Tuate leng Khrist itna in ahon gawmkhawm a, kiittuah a i kikkaikhawm ding uh ahi.

Vaigam khawng ah vazin lehng, kristian hilou tampite lak ah pasal khat dinsang, vom ngenngom in naksau mahleh,

Kristian ahi chih i theih chiang in ngaihnat theihpah in om hi.

I kihehpihtuahna in bang gen nei in, bang phattuumna anei diam aw? Thilte ahi ding bangtak a a pai a, kuamah haksathuak i om louh sungteng i kihehpihtuahna sepsuah, latsakna ding a tawm hi, omlou bel ahi kei. I ut leh, i ut hunhun in i ki-ittuahna latsak theih gige ahi. Himahleh, haksa thuak i hong om chiang in a latsakna ding hun lemtang hong om a suak hi. Tuabang hun a i latsak kei leh tuh, kihehpih chiahlou i hi ding. Huaiziak in, haksathuak om hun a kihehpihtuahna latsak a lou theilou ahi.

Nasepte 4:32 ah gingu masate a thilneih tengteng uh kikop ua, kuamah a hausa tuam, a zawngtuam omlou uh ahi chih ahon gen hi. Gingu a tawm mahmah lai ahi ahon chisak hi. Ahih theihlouhdan Anania leh Saphira-te nupa in ahon langsak ua, a sihpih hial uhi. Hiai in, ki-ittuahna lampi zuihlouh sih theihna ahi chih a gen thei diam? A nunglam azaw huchitel nawnlou in ahon musak hi. Tuni chiang in leng huchi nawnlou ahi chih i mu chiang uhi. Himahleh, a poimoh nawn kei chihna ahi het kei a, hihdan

a tuam deuh ngaita ahihdan alatna ahi.

Ei gingtute bangziak a kihehpihtuah ding? Ei gingtute i kihehpihtuahna ding ziak masapen tuh i Toupa Jesu thupiak ahiziak ahi. Aman *“Noute khat leh khat na ki-ittuahna uah leitung miten ka nungzuite na hi uh chih ahon thei ding uh”* achi hi (Johan 13:35). Toupa kibang, Toupa khat nungzuite i hihman un, i kihehpihtuah ding uh ahi. A haksa thuakte kipanpih theih dandan a i kipanpih ding uh ahi. Huai tuh kihehpihtuahna sepsuahna ahi. Dopkang ngaite domkang in, panpih ngaite panpih in, i kihehpihtuah ding uh ahi.

A ziak nihna ding tuh itna ziak ahi. I biak uh, a nung i zuih uh Pathian, Itna Pathian ahi. Kuapeuh a itlou in Pathian a thei kei, Pathian lah itna ahi ngala (I Johan 4:8). I ki-ittuahna in ahon kihehpihtuhsak hi. Kihehpihtuah i chih chiang in, mi khat in midang khat hehpih chihna kia hilou in, hehpih a om pen inleng na hehpih thuk chihna ahi. Itna in a itte tung a thilhoih a tun ding a deihsak tawntung a, huai a tun theihna ding a ahihtheih peuhmah ahih

hi. Tuamah bang in, thilhoihlou atun khak ding leng ei hihtheihna tan ah i venpih hi. Kiittuahna akipan kihehpihtuahna ahong piangkha hi. Eite khehpihtuahna Pathiana kipan ahildan Paul in hichi in gen hi:

*“Huan, unaute aw, Masidonia gama saptuam pawlte lak a Pathian hehpihna piakpen ka hon theisak ding uhi. Huchi a, haksa thuakna, ze-etna thupi a, a kipahna uh kichingzou leh nakpi-a genthei hinapi, amau lam a a thilphalna thupi un huaite khupzou ahildan bang. A neih bang un, ahi, aneih sang ua thupi inleng, amau utthu in a pia uh chih theihpih ka hi”* II Kor.8:1-3.

Hiai ah, Masidonia gam a Saptuamte thilphalna, Korinth Saptuamte chouna ding in Paul in zang hi. Masidonia gam a saptuamte, haksa thuakna ze-etna thupi thuak a genthei hinapi in, thupitak a thilphal a a ommawk uh Paul in thupisa in Korinth saptuamte chouna ding in zang hi. Hiai a thilphalna un Masidonia saptuam sung a mite a ding in haksatna bangzahta a thupi atun diam aw chih ahon ngaihtuahsak hi. Haksatna atat thupi mahmah ding hi. Himahleh, hehpihna, itna in tuate thuak ngapsak hi. Kipaktak in thuak zousak

hi. Himahleh, i theih ding uh tuh, hiai pen haksa thuakna in tawplou hi. Bangkimhihthei, bangkimthei, bangkim amah deihbang a paisak gige Pathian in, kua'n bangzah thuakta a, bangzah a thuaklai poimoh a, bangchik hun a, huai thuakna kipahna suahsak kul hiam chih thei mahmah hi.

Tuamah bang in, gingtute leng, haksa thuak i om chiang in, I hihtheih bangbang un i kidawn chiat ding uh ahi. Huai in haksatna giktak zangsak hi. Nidang a la i sak sek uh, tua kisa nawnlou, a theilai i om uh ka gingta, hiai ahi:

*Michih kikhasiat in,  
Lungsim kithutuak in,  
Pathian tate i kihouthei  
Van Mi omdan ahi.*

Hiai tuh English a “Blessed be the tie that binds, our hearts in Christian love, the fellowship of kindred minds, is like to that above” chih i lehkhiaakna ahi. Hiai mah tuh kihehpihtuahna lampi apai gingtute omdan ahi.

Gingtute kihehpihtuah lehang gingtu hinkhua nuam mahmah ding hi. Kuapeuh in ei puakkhop chiat puakgik i pua uhi. Puakgik hon dawnzangtu ding i poimoh chiat uhi. Kihehpihtuah chiat in, i puakgikte uh kitheihpih in,

kidawn chiat lehang a nuam in a hoih mah ding.

Huchi hileh, a poimoh mahmah tuh, bangchi leh i kihehpihtuah thak thei nawn ding ua? chih hi. Pathian ah kitahlut lehang, Pathian itna in dim lehang, i kihehpihtuah thei ding uhi. Pathian itna ahi, itna apan hehpihna hong piangkha hi. Pathian neiten hehpihna anei uh. Kihehpihtuahna ding in Pathian neih kul hi.

Hiai i sim kawm ua i kingaihtuahna ding a om: Mi hehpih theihna ka nei hia? Tua kei dinmun ah Jesu omleh, hehpihhuai ka sak aman bangzah in ahehpih

diam aw? Ka hehpih chi lel in a beisak diam? Banghiam bek hehpihna ziak a hih a nei diam? Thilhih tellou ginna a hawmpi ahihbang in, thilhih tellou hehpihna leng a hawmpi ahi. Kihehpihtuahna lampi kristiante'n zui chiat lehang kristian hinkhua a nuamtuan mah ding. Pathian leng a kipaksak mahmah ding.

*Ngai in, unaute kituak diamdiam a omkhawm, anak hoih in a nak nop mahmah hi. Lu a thaumanpha, khamul a luangkha, Aaron khabemul a luangkha bang khop a manpha ahi. Hermon daitui chiim, Zion tangtung a ke zel bang ahi-(Sam 133)* ■

## *Palm Sunday Message*

# THUNUAILUTNA A VUALZOU KUMPI JESU

- Rev. V Goubiakmuan, DS EBC, Sialkal Division

*“...na Kumpipa kiniamkhiak in, Sabiltung tung, Sabiltung nou tuan ngei nailouhna tung a tuang in na kiang ah a hong hi” [Zak. 9:9]*

**C**HIBAI BUKNA: I deihtoh leh ngaihnat mahmah uh Khristian Thukizakna simtu it, thunuailutna a Vualzou Kumpi Jesu Khristian min manpha suang in, Palm Sunday 2025 chibai ka hon buk hi! Hiai Vualzohna ni pen, i Toupa Jesu'n a sih ding thumvei a genkholh nung, gimthuakna nipikal kipat hun leh Khros a a sihma a mipite lak a a kilat tawpna ahi. Jawlnei Zekariah in ana genkholh, Jerusalem a vualzou a a lut ni champaha Palm Sunday [Tumnah tawi Nipini] chi a pahtawina thupitak a i zatni uh ahih toh kiton in, i Toupa vualzou a Jerusalem a a lutna thu, Laisiangthou a i muhte pansan in i sutkhawm ding uh.



## 1. A THU OMDAN:

Laisiangthou [Matt. 21:1-17; Mk 11:1-11; Lk. 19:28-40; Jn. 12:12-19] a i muh bang in, Judate'n khopi siangthou a chih uh Jerusalem manoh a Jesu leh a nungzuite a hong pai lai un, Bethphage khua a Olive mual hongtung ua, tua mun ah Jesu'n nungzuite lak a mi nih sam in, Bethphage khua mitsuan kawm in, *'na mazawn ua khua ah va hoh unla... Sabiltung nou kikhik, kuamah tuan ngeilouhna na mu ding ua, phel unla, honkai un'* chi in sawl hi. Thumangtak in nungzui sawl a omte va kuan uh a, Toupa' thupiak bang geih in a va lohching uhi. Tua sabiltung tung ah Jesu tuang in, mipite'n Rome Sorkal ukkhumna apan salam suahtakna lunggulh in, husa thupitak toh 'Hossana' [Tu mahmah in hon hondam in] chi a pahtawina aw suah a kikou zuazua in Jerusalem lutpih uhi. Hiai thute Jawlnei Zekariah in ana genkholh tangtunna ahi [Zek. 9:9].

## 2. JESU' TUANNA SABILTUNG:

Sabiltung nou, kuamah tuan ngei nailouhna, ganhing sianglou a ngaih ahih gentaklouh, ganhing mawl leh hai a gen ahi. Himahleh Jesu'n vualzou a Jerusalem a alutna

vanzat ding in tel khelkhel hi! I Toupa'n thil hat leh thupite a tel masa kei a, zat theih ding a a kiman nak uleh bangmahloute a tel chih kilatna in ganhing mawltak khat a tel hi. Sabiltung in lemna leh kingaihniamna a ensak chih ahi. Hiai Sabiltung tanchin tamlou i en masa ding:

### i. **Sabiltung tung ah Jesu**

**tuang:** Chiil louh sabiltung, khau-khih a om, i Toupa Jesu' zat theih ahihna ding in a khihna phelkhiak a poimoh masa hi. Phelkhiak ahih nung in, Jesu' zat theih ahihna ding in a kiang tut poimoh leuleu hi. Tua bang ahih nung in Jesu'n a tuanna ding in zang hi. Huchi in, Jesu a tung ah a tuang a, sabiltung leng thumangtak in pai leuhleuh mai hi. Unaute, khelhna khau in mi chih hong khih hi. Tua khelhna khualhualte apan sutkhiak na hita hia? Damna leh suahtakna Jesu Khris kia ah om hi. A kiang na zuanta hia? Toupa'zat theih ding in na kiman hia unau? Ganhing mawltak sabiltung tung ah Jesu tuang a, sabiltung in Jerusalem lutpih hi. Jesu'n bangziak a vualzou a Jerusalem a alutna dia sakol hiam,

ganhing dang zanglou a, sabiltung zang ahia? A ziak tuh (a) Jawlneite'thu genkhoh tangtunna ahi [Zekariah 9:9], (b) David Suan Kumpi ahihna genna ahi [1 Kum. 1:33; Matt. 21:5]. (c) Thunuailutna tungtawna kilemna thugenna ahihziak ahi [Zak. 9:10]. Hiaite apan kingaihniamna tungtawn a vualzou i Toupa ahihna i mu thei hi. Huaiziak in, a nungzuihna ah, amah hinkhua leh sinsakna zui a, a poimoh leh thunuailuttak a a vuallezaw hihna leh a zaangzaw teel a, a niamlam zel a kalsuan mite Toupa kiphahna leh a deih Khristian nuntakna ahi zaw hi. [Matt. 5:3-12; Isai 53:7; Luka 6:27-36; 18:14; Jak. 4:6;].

ii. **Ganhing tualniam sabiltung' hamphatna:** A' tung a Jesu a tuan masiah kuamah phawk khaklouh ahi. Mipite'n Kumpi Jesu zahtakna leh pahtawina a a puanphahte uh leh, a sawlnah phahte uh tung a pai ziahziah in sabiltung in Jesu' hang in hamphatna thupitak ngah hi. Unaute, mite' hon phawkna, pahtakna, pahtawina leh hamphatna i tan zouzaite

uh, i tung a tuang Jesu ziak ana hi maimah hi veh aw maw...! Ahi, Toupa' hoihna midangte apan i muh Chiang in, i tung a tuang Jesu Khri i mangngilh louh ding ahi. Tua thei a kingainiam gingtute hi thei zel ding in Pathian in hon ompih hen.

**3. KUMPI JESU PAHTAWI A KIKOU MIPITE:** Hiai mipite Jerusalem khua mipi pawl khat leh Jeriko apan Jesu nung ana zuite leh Paikan Ankuang um ding a hohte hi ding ua gen ahi. Kumpi pahtawina hih ngeina dan in [Lev. 23:40; 2 Kum 9:13] tumnahte tawi in- "Hossana"[Hoshi'a na] "Hondam in" or "Tu mahmah in hon hondam in" chi in tumnahte tawi in husa thupitak suah in kikou uhi. A puante uh Jesu paina ding lampi dung ah phah ua, a phah ding neiloute'n singsawl sat in a phah nalai uh!

A deih leh lamet uh bel, Roman Government thuneihkhumna nuai a haksa thuakna apan simlei vai hondamtu [political deliverer] ding a Jesu Khri bawl sawm ahi uhi. A kipiakzohna uh thupi petmah hi. Tuni a Khri i tangtawn Kumpi ding a teel a, tangtawn hotdamna tangte'n i Toupa zahtakna leh thumanna leh

kipiakzohna gen tham ding i nei mah ding ua aw...!?

*“...na Kumpipa kiniamkhiak in, sabiltung tung, sabiltung nou tuan ngei nailouhna tung a tuang in na kiang ah a hong hi” [Zak. 9:9]*

A taktak in Jesu bel Kumpi kia hilou in hihna thum [three offices] kopkhawm ahi: 1. *Jawlnei* [Diu. 18:15; Matt. 21:11; Luka 7:16; 19:41-44; John 4:19; 9:17]. 2) *Siampulian* [Heb. 7:24-27; 4:14; 6:20; 2:17'; 1Pet. 2:2-10], 3) *Kumpi* [Kil. 17:14; 19:16; Phil. 2:9-11; John 18:36; Isai 9:6-7]. Jesu Khريس salam Kumpi ding a deih a, tuabang lungput toh en ahihman un, a muhna uh dik zoulou hi.

Unau, i Toupa min i lohna leh amah i lungulhnate khovel vai tanlel ahi kha ding e...! A nung i zuihna leng khovel hamphatna leh vangphatna deihna lel hiam, ahihkeileh eimah nopsakna Chiang tanlel a a nungzui kha, ankam limna lel a A' nna sem kha houh i hi kha ding uh!

Mipite' thusam, 'Hossana' chi a aw suahna pen phatna kammal ahi mah hia le? Ngaihtuah huaipi ahi. Lungsimtak toh Toupa i Pathian tung a i zat Chiang in, 'Toupa, Nang tellou a hihtheih khat mah zong neilou, na hon

hotdam kei leh mangthang petmah ding ka hi' chi a mangbang a kikouna ahihman in, i Pathian' zakna ah ngaih mahmah hi. Huaiziak in Amah i hinna leh damna, bitna kulhpi muanhuai ahi chih i phawk a, amah a i kituklutna pen Pathian kipahna leh lamet ahi.

**THUKHITNA:** It leh ngaih tampite'n sihna hanmual hon liamsan nung ua, Palm Sunday tungtawn a Toupa pahtawina aw suah thei lai ding a hun pha piak a omlai i hihman un hampaha lua i hi. Khovel in siat semsemna manoh lellel ahi. Endih! sahkho makai- Siampute, Pharisaite leh Sadukaite omna Jerusalem in, a khosung ua vualzou a Jesu lut Pahtawi a mipi a kikou souhsouh lai un, *“Hiai mi kua ahia”?* a chi maimah uhi! Jesu giak lou in Bethani ah a giak daih! Jesu nawlkhin Jerusalem khua mite' tan a mulkimhuai tel!

Unau, khovel vai a pumbuai in, Khريس i nawlkhin kha ding uh! Ahi, a kikhel ma in kivel thak ni! Salam leh khalam ah Toupa loungal i bitna leh damna ding taktak omlou hi. Sabiltung neitute' bil ah, *“Toupa'n a deih a ahi”* chih thu zak haksa mahmah ding kimlai, Toupa' zat ding in phal mawk uhi! Nungzui nihte' thumanna gah

ahi! Lohchingtak in kik nawn geigei maimah uhi. Peter in, “Heutupa... na thu in lente ka paai nawn ding” [Luka 5:5] a chi a, a len uh kek zawzen in ngasa tampi a man maimah uhi. Gingu nun diktak zaw thumanna leh thunuaulutna ahi [I Sam. 15:22,23; Matt. 5:3-12].

Ahi, huai mah tuh Khristian Vualzou hinkhua ahi mahmah hi [Luka 18:14; Jak. 4:6,10].

Tungnun tuh teitei a zohna lam hilou in, thunuaulutna a zohna ahi. I zuih pa i Toupa thunuaulutna a vualzou kumpi ahi chih mangngilh kei ni [Zak. 9:9]. Bangkim ah i tung a tuangpa’ thu mang in, amah bang a thunuaulutna hinkhua a nungta gingu hih i sawm tek ding uh. Simtu deihtak, Toupa’n gingu hinkhua diktak a hing thei ding in hon Vualzawl hen! ■

---

## GOOD FRIDAY MESSAGE

# PATHIAN THILTUP, KROSS A JESU SIHNA

- Rev S Thangjohnson, DS Mizoram Division

*Khelhman tuh sihna ahi ngal a, Pathian thil thawnpiak bel i Toupa Kris Jesu ziak a Tangtawn hinna ahi ( Romte 6:23). Leilung pianma a gawhsa Belamnou, asisan in khovel Hondam hen aw...*

KTZ simtute tengteng Hondampa Jesu min in Good Friday Chibai.

**T**HUMASA: April 18,2025 i tung nawnta uhi. Kum sang nih val paisa a Khovel khial a mangthangsa tankhe ding a Pathian Tapa tang neihsun Jesu Khrist, Kalvary Kross a mikhialte sikletang a asihni champaha i mu thei lai hi. Mi khenkhat in zekai asak bang un i Toupa zaw athuchiam lam ah azekai kei hi. Kuamah manthat deihlou a mi tengteng hong kisiik ding deih in noumau lam ah adohzou ahi zaw ahi. Hiai hun poimawh takmai i zat laiin “Kross a Jesu sihna a Pathian thiltup” tamlou kikum khawm leng ut huai ka sa hi. Mihingte tuh Pathian (kha/itna) batpih a siam i hi uh. Deihtel khelhna (khemna) ziak in Pathian apan khenkhiat(posiah) in i om uhi. Mikhialte it mahmah Pathian in eite adin hotdamna lampi ahon bawlsak hi. Kross a Jesu sihna lampi tawn lou in kuamah Pa kiang tung theilou ding hi. Pathian hehpihna(a ngaihdamna) Jesu

kia ah aom, ginna a saanna tawn a hotdam hihtheih ahi, thilhih ziak hilou hi. Huaiziak in midikte sam ding hilou, mangthangte zong a hondam ding in Mihing Tapa ahongpai ahi him ahi. Hotdam na hita hiam ? ( 2Peter 3:9; Johan 14:6; Ephesate 2:8; Luka 19:10).

Kros a Jesu sihna a Pathian thiltup tawh kisai bangzah hiam hiai anuai ah i kikum zek ding uh:

## **I. PATHIAN TANGTAWN THILTUP HIHTANGTUNNA:**

Jesu Kross a asihni tuh mikhialte ngaihdamna dia Pathian in a tangtawn thiltup a hihtangtun ni ahi. Genesis 3:15b ah 'Numei suan in na lutang agawpsak ding' chi in tangtawn Toupa'n gul ahamsiat ahi. Hiai ngei tuh ahi numei suan apiang, Toupa Jesu'n "*zoh ahita*" chia Kross tung a phuan. Setan khemna ziak a sihna apan kua ahia hon suaktasak thei ding? Jesu Khrist vang a sihna tung a vualzohna hon petu Pathian tak kia'n Thupina tang hen. Unau melma zoutu Jesu na neita hia? Khelhna sal a tang na hilai lai maw? Kros a Jesu sihna in na khelhnate sikhawmpih ataktak a sangtu na hih lezaw maw, na suakta ding a khelhna tung ah zohna na nei thei ding hi. Babulon saltangte bang a Zion la sa dia sawl aomte na bang kha ding.

**II. PATHIAN DIKTATNA KILANG:** Genesis 2:17 a Pathian in, 'na nekni mah in

na si ngeingei ding hi' achih thei gegu in 3:6 ah numei in, 'agah khenkhat alou a aneta hi'. Hiai apan khelman sihna hong kipanta hi. Mi tengteng in thil ahikhial ua Pathian thupina tangzouta kei uhi. Himahleh thu kipahhuai penpen tuh mikhailte sikletang a khelhna neilou Pathian Tapa Jesu hong sihna ahi. Hiai eive itna lamdang amin ngaih e! Aw lamdang hi a lamdang lua chih ka la hi tawn tung ding... ka Hondampa hon itna. 2Kor 5:14-15 ah, "*mi tengteng sih sik in mi khat asi a huaiziak in mitengteng asi uhi. Ahingte leng amau adia ahin nawn louh ua, asih sik ua si a thounawn a ding a ahin zawkna ding un, ahi mi tengteng sik a asih.*" Amah Jesu ziak kia in ahi Kha kibang a Pa kiang lut theihna i nei tuaktuak ta hi (Eph.2:18). Unaute i Pathian zaw khelhna toh omkhawm theilou diktat/siangthou ahi. Khelhna hua mahleh mikhialte it ahi. Khelhman petu Jesu sihna a na khelhna tengteng toh sikhawm na hih ken zaw maw, a diktat Pathian mai ah na khelhna in

hon mukhe thouthou ding ahi chih thei ni. (Nambars 32:23).

**III. PATHIAN IN KHELHNA NGAIKHAWK:** Hebrute 9:27 ah *“Mihing a ding in khatvei sihseh ahi, huai nung chiang in vaihawmna aom ding.”* Jesu sihna ah Pathian in khelhna lauhuai a ngaiikhawkdan leh A vaihawmna dan Jesu thuakna in taklang hi. Hiai Jesu thuakna nang le kei ziak i ai-awh ahi. Jesu'n hichi bangkhop a soisakna, zeepna, gawtna, linglukhu akhuk tuh Pathian in khelhna azadah/ngaikhawk mahmah a agawtna leng anasa mahmah hi. Leitung akhial phapente gawtna sangpenpen Jesu' athuak sakna in mihingte khelhna ziak a Pathian hehna asandan genkhiatna ahi. Khelhna kisiik a taisan a Jesu nasaan kei aleh A Tapa neihsun hawilou a hiai bang sawina nasa thuaksak ngam Pathian in na tungtang vaihawm thouthou ding ahi. Unaute kisiik in khelhnate i tawpsan in Jesu kiang i zuan kei ding ua hia? Tu ahun lai in kibawlpha chiat ni.

**IV. PATHIAN ITNA TAKLATNA AHI:** Johan 3:16 Pathian in ahon itna a taklangta A Tapa tang neihsun ahon piakna ah. Abraham in Pathian a itna ze-et a aomlai in a tapa neihsun Isaak

Moria tang ah hlankhia hi. Unau nang le na neihsun na hlatkhiat ding tuh na hinna ahi. Pathian kiang ah na neihsun na hinna lankhia in pekhe siang sisip lechin hinna thak a hon pe ding hi. Pathian sang a itzawk i hau thei lua a ahi. Pathian in Israelte kiang a that gai sipsip ding achih lai in khet/hawi anei sek ua, huai tuh a hihkheluh uh ahi. Pathian in atengteng a it ding in a hon deih bang in i bangkim Toupa kiang na pevakta hiam?

Pathian inleng atengteng a ahon itna alatsak bang in nang leng amah atengteng in it thuk sam din hon deih ahi. *“Aw Peter nang hiaite sang in kei non itzaw hia?”* Unau Pathian in atengteng a hon it bang in nang leng atengteng in na it hiam? Pathian na itdan ana ki-enchain thak in.

**V. PATHIAN NGAIH DAMNA LAHNA AHI:** Ephesate 4:32. Pathian in Khrist a hon ngaihdam bang in noumau leng kingaidamtuah chiat un. Hiai tuh Amah gingtu anungzuitute niteng hinkhua a zuih dia thupiak ahi. Pathian hon ngaihdam dan etton anei a ngaihdam ding i hih leh tuh athawn a ngaihdam ding chihna ahi. Mathai 18:21 a i muh bang in sagihvei mun sawmsagih

ngaihdam ding in agen nop tuh ngaihdamna hinkhua neih ding ahi. *Na unau na ngaihdam kei leh Pathian in na tung ah tua bang in ahihsam ding hi*, chih tang 35na ah genlai hi. Hiai thupiak thil haihuai bang hial

mahleh na hinkhua ah zuih ana tum sin himhim in aw. Good Friday pual in na ngaihdamna hinkhua ki-enchian thak ni.

*Toupan simtute tengteng hon vualzawl hen aw!* ■

---

## KHRIST THOHNAWNNA POIMOHNA

- Rev T Thangziam DS Lamka South Division

**T**HUMASA: Toupa Jesu'n "Kei thohnawwna leh hinna ka hi; kuapeuh hon gingta tuh si mahleh a hing gige ding; (Johan 11:25)" achi bang ngei in. Misi lak akipan a thawnawn ni Easter Sunday i tungnawnta uhi. Hiai Khrist thohnawwna in khovel ah thil bangkim kilamdangsak in, hunbi khenna dan ah leng AD leh BC kikhenna tanpha a piangkhesak hi. Hiai tuh leitung mihingte thilsuina leh chiamteha ding ah a poimoh penpen ahita hi. Jesu Khrist thohnawwna tuh khovel a ding in leng thillamdang leh chiamtehtak ahildan chiangsaktu ahipah ngal hi. Kum 1957 in California a kipan lengkhia lenna khat vukgam ah tuahsia hi. Tua lenna a semte lak ah khat Lieutenant David Steeves tuh vangneihhuaitak a suakta in. Anung ni 54 nung in khokhat ah vaklut thei zenzen in, huai khua akipan a tenna kholam ah a pi uhi.

A nnasep ngeimah semding a a va ki-report chiang in a pomthei himhim kei mawk ua, a ID leh lehkha poimoh tengteng a peimang ban ah theihpihtu ding kuamah suakta a omlouh ziahi. Himahleh kum 20 zet kivei nung 1977 kum in tua vukgam tawnsuak a khualzin tangval honte'n (Boy Scouts) tua lenna

kia tuh a mukhia uh kichi hi. Huai lenna sia a muh uh David Steeves ading in lenna kia akipan suakta ahildan chetna poimohtak hongsuak in, a sep ngeimah semnawn sak theitu ahi maimah hi. Tuabang in hanvuak tuh Jesu thounawn taktak ahil dan chetna ahi. A thounawn ahi chih mit ngei a muten thohnawwna

thilhihtheihna a hamphatpih bang un. Mit a mupha lou nang leh kei tanpha inleng tua thohnawwna ziak a vualzohna tang i hihmanin. Khrist thohnawwna poimohna tamlou enkhawm leng i chi ahi.

**HOTDAMNA BUKIMNA AHI:**

Sawltak Paul in *“Jesu i Toupa misi lak a kipan a kaithoupa gingtate i hi a. I ginna tuh diktatna a seh ahi ding hi. Huai Jesu tuh i tateleka ziak a matsak a om a, siam i tanna ding a kaihtoh a om ahi. (Rom 4; 24-25)”* achihi tuh i hotdamna bukimna ahi. Khelhna ziak a Pathian mai a misi i hihman in A Tapa a hongsih a a thohnawn angai a, nang leh kei gingtu kichite ading in a poimoh petmah ahi. Khrist thohnawwna poimoh dan muchiantu Paul in *“Khrist kaihtoh a a om kei leh, i thugen uh bangmah lou ahi dinga, na gin uleng bangmah lou ahi ding hi (1 Kor 15;14)”* achi nawn hi. Hiai thugin poimoh takmai zom in khovel a Baptist saptuamte’n thusehni (ordinances) i nei uhi. Huai tuh asihna leh thohnawwna theihpihna ding in baptisma tang in i puangzak ua, huan theihgigena ding in

sacrament ankuang siangthou i sawkkhawm zel uhi.

Khrist thohnawwna tuh hinna thak i neihna ahi, chih Paul ngeingei in kichiantak in hon sinsak hi. Rome laikhak ah *“A sihna kibatpih a amah toh i kizop khit ngal un tuh, a thohnawwna kibatpih in leng i kizom sam ding hi. I mihing lui a kiang ah kilhden in a om samta chih i thei; huchi a khelhna pumpi hihmanthat a a om theihna ding leh tua kipan a khelhna sikha a i om louhna ding in. Kuapeuh sisa tuh, khelhna lak ah a suaktata ngala (Rom 6;4-6)”* achi hi. Hiai tuh gingtute’n Khrist sihna leh thohnawwna ziak a hinna thak i neihna uh ahi. I hotdamna bukimnakna ahiban ah thugin puanzakna poimohtak leng ahihman in, Khrist thohnawwna tuh gingtute thugin kingakna bulpi leh poimoh mahmah ahi chih phawkthak chiat leng i chi ahi.

**KHOVEL KHENLAM LAMETNA HON PIA HI:** Europe gam a kidouna mulkimhuaitak Crime and War (1853-1856) hunlai in, sepaih tangval nou khat tuh puanbuk sung ah sisa a muh



ahi. Kikapna ziak a naktak a liamna tuak ahia, simai ding a a kitheih ziak in puan insung a vak lut in, bawkkhup in a khut sisan kai niaunuai tuh a Bible kiphensa tung a nga in *“Huan, Jesu’n a kiang ah, Kei thohnawwna leh hinna ka hi; kuapeuh hon gingta tuh si mahleh a hing gige ding (Johan 11;25) chihna laitak sim hi ding in agingta uhi. Khrist sihna akipan kaihthoh a aomna in gingtute tuh sihna khenlam lametna a hon pia hi. Huaimah tuh tuni a nang leh kei Khrist thohnawwna gingtute lamet ahi.*

Paul in a khalam mit toh muchian lua ahihman in hiai thohnawwna sapum om dingdan kichiantak in hon sinsak hi. *“Misite thohnawwna leng tuabang ahi. Muatthei a tuh in a om a, muattheilou a kaihthoh in a om ding (1 Kor 15;42)”* achi hi. Hiai lei taksa zaw ginalou leh baibawmtak a saktuah ahi a, natna neuchik i nei alah haksa i sa pah uhi. Nathei leh sethei kia phet hilou in muatthei ding a kibawl ahi. Himahleh Khrist bang a kaihthoh a i om hun Chiang in muatthei lou sapum toh hihlamdang dingte i hi chih Laisiangthou hon sinsak dan

ahihman in, huai tuh i taksang in i gingta ua a ngaklahhuai petmah ahi. Hiai lametna leh ginna in khovel sihna khen lam ah lametna hing hon neisak in khamuan huai mahmah hi.

**KHRISTIANTE GINNA**

**KINGAKNA AHI:** Jesu Khrist sihna leh thohnawwna omlou hileh khelhna ah i om nilouh louh ding ua. Khristian hihna in omzia a neikei ding chihna ahi. Paul in *“Misite kaihthoh a a om kei un zaw, Khrist leng kaihthoh in a omta kei ding. Huan, Khrist kaihthoh a a om kei leh, na gin uh bangmahlou ahi ding a, na khelhna uah na om nilouhlouh uh ahi ding. (1 Kor 15; 16-17)”* achi hi. Hiai damsung kia a ding a lametna neite tuh mi hehpih pente ahihdan uh a genna ah *“Tu damsung kia a Khrist tunga lametna i neih inzaw mi tengteng dia mi hehpihhuai pen i hi ding hi (1 Kor 15;19)”* achi hi. Khrist kaihthoh a omna tuh gingtute thugin kingakna poimoh mahmah ahi. Hiai khovel damsung kia a lametna neite tuh mi kingaisia leh mi hehpihhuaipente ahi uh. Tuabang ahihlai in Jesu Khrist thohnawwna in tangtawn hinna neihna ding khop lametna hon pia hi.

Sawltak Peter in *“Misi lak a kipan Jesu Khrist thohnawwna ziak in lametna hing mu ding in a hon suang nawn a, Huai ah nakpitak in na kipak uhi, tu'n (a kiphatmoh leh) khemna chiteng ziak in lungkham tadih mah le uh chin; ( 1 Pet 1; 3,6)”* achi ahi.

Sahkho tuamtuamte pathian Mohammadte, Gautama Budhate, Krisna leh dangdangte leng a si ua a thounawn uh chih kimulou hi. Laisiangthou in bel *“Hiai lai ah a omta kei; a gen bang ngei in a thou nawnta, a lupna mun en him un. Huan, pai meng unla, nungzuite kiang ah, Misi lak a kipan a thou nawnta ahi; ngaidih uh, Galili gam ah na ma uah a pai; huailai ah amah na mu ding uh, chi in, hilh un (Matt 28;6-7)”* achih tuh thounawn ahi chih chetna ahi a. Mi tuamtuam tampi kiang ah leng a kilak chih Laisiangthou in hon hilh hi. Sawltak Paul in *“Khrist kaihtoh a a om kei leh, na gin uh bangmahlou ahi ding a, na khelhna uah na om niloulouh uh ahi ding. (1 Kor 15; 17)”*chi topmai hi. I thugin kingakna leh gingtute lamet pen hiai mah ahi. Ginna a mihangsan paimasate leh tuni a nang leh kei hatna

thuguk leng hiai mah ahi (Heb 11;13). Khrist thohnawwna in na hinkhua ah thilhihtheihna leh gen anei taktak na diam ? Kingaihsun in !

**THUKHITNA:** Tunu in gingtu nang leh ken Khrist thohnawwna tungtawn a lametna leh dinmun thupitak nei i hihlam i kiphawk ding ahi. Paul in *“A sihna kibatpih a amah toh i kizop khit ngal un tuh, a thohnawwna kibatpih in leng i kizom sam ding hi. (Rom 5;6)”* chi hi. Khristian gingtute tuh asihna a i sih ngal leh a thohnawwna ah a mah batpih in kaihtoh in i omsam ding uh chih ahih tuh a khamuanhuai in hon ngaklahsak mahmah hi. Hiai lei taksa zaw hatlou leh chau in a omsek a, natna leh veisiatna chi tuamtuamte'n hon tuamzel mahleh Khrist bang a thohnawwna sapum toh kaihtoh a i om ding tuh i ngaklah pen ahi.

Tuabang a kaihtoh i hih hun Chiang in *“Muatthei a tuh in a om a, muattheilou a kaihtoh in a om ding (1 Kor 15; 42)”* achi hi. Huan Paul mah in a khalam mit toh thohnawwna muchian lua ahiman in *“Pahtawilouh a tuh in a om a,*

*thupitak a kaihthoh in a om ding. Hatlou a tuh in a om a, thilhihtheihna nei a kaihthoh in a om ding (1 Kor 15;43)*” achinawn hi. A genzelna ah salam pumpi a tuh in a om a, khalam pumpi a kaihthoh aom ding achihte khawng, huan huai hunchiang in melma nanung chih hial a om sihna tuh zoh in aomta ding a. “*Aw sihna, na zohna koi a*

*omta ahia? Aw sihna na gu koi a omta ahia? (1 Kor 15; 55)*” chih thu a tak a bukimta ding ahihman in ngaklahhuai hi na maizen e maw, ahon chisak ahi. Simtu it aw, Laisiangthou gen bang in Khrist sihna leh thohnawanna in nang ah thilhihtheihna a neina diam ? chih kivelthak ding in chouna ka honbawl thak hi. Toupan hon vualjawl hen. Amen. ■

---

## SOCIAL MEDIA ZAT MANPHAT DING DAN

- Pastor Khenthang Buansing

**Kolosate 3:17** “*Huan, na hih peuh uh thugen hi in, thilhih ah hita leh, amah tangtawn Pa, Pathian kiang a kipahtu gen kawm in Toupa Jesu' min in hih vek un.*”

**THUPATNA:** Kum 10 val zek khawng paita apan i gam leh i mite lak ah '**Digital Era**' hong tung a, khovel khantouhna in hon *phanon* a, *Smartphone* tawi ngei ding a kikoih ngeiloute'n i khutsung uah i tawi chiatta uhi. *Smartphone* leh *internet* in a hon kentel tuh '**Social Media**' kichi khovel pumpi a mi tuamtuam, thil tuamtuam theihna, muh theihna, kitheihthuahna, kithuzaktuahna leh kizopna banah mahni ngaihndan puankhiat theihna ding a dohdan (platform) miteng in ana ngahtheih khat leng hong suak hi. A minthang diakte **Facebook, Instagram, WhatsApp, X (Twitter kichi), YouTube, Telegram, Messenger** chihte ei lak a kithang deuhte ahi (adang tampi lak ah). Hiaite zongsat (addict) theih tham a, mi tampi in nekmuhna in leng zang thei uhi (*video*, *limlak*, *content* bawl in a entu a tam dungzui in sum lalut uhi). A zangkhialte' ading in hun tampi mansuahna, mi toh kisiatna leh sihna tanpha tuntu suakthei hi. Internet tungtawn a thil hoih leh phatuam tampi a om kawm in kikhemna, zatkhelhna leh zongsatna leng baihlam hi.

I khut a i tawi phone zang in, kalsuan ngailou a khutmuk apan khovel kilchih i va tung thei a, i ut teng mutheih, bazar kai theih, nek ding tutmun a sap (order) theih, utna munmun a sum kithottuah chihte baihlam mahmah in, kizang phatuam mahmah hi. Huchih kawmkawm in, aleh lam ah pilvan tuak leng tampi om khathei hi.

**1. Zat khelkh khak theih:** *I Tim 6:10a “Sum deih luatna tuh gilou chiteng bul ahi ngal a..”*

Social media (abik in Facebook, Instagram, WhatsApp chihte ah) account i nei chiat ua, mi tuamtuam toh kitheihna leh kithuzakna ah a phatuam mahmah a, huai kawmkal ah i theihchetlough mi hiam, thil khatpeuh theih ut luatlough a, va mawk limbawl louh ding leng om kha ding hi.

i). Gamdang apan i van ding (*parcel*) a hong kikhak, hiaite hon thotkhiakna ding ua sum hiai zah *deposit* masak ngai chihte khawng a *message* na muh leh *delete* suk pah ding ahi. Mi tampi in gingta ua, sum tampi mansuah tham uhi.

ii). Facebbok leh Instagram diak ah sapmin pian sim,

a mel leng huai lamte pian mah apan request om ut mahmah a, huaite a tangpi in *Stock trading* leh *Crypto Mining* chihte buaipih hi nuam mahmah ua, hon zawn nuam hi tangpi uhi. *Cryptocurrency* (Bitcoin i chihte) a *sumkawlvei* kichi tulai a kithang khat hi a, khovel pumpi ah kuapeuh in a omna mun chiat uapan *trading* hih thei ua, hiai toh kisai in leng kizolna uang mahmah hi.

iii). Pawlam a kipan sese lou in leng, i khut a i tawi Phone pen ei mimal mahmah, i inkuan, i sum leh pai zekna tan subuaikha ban ding a khemna vanzat chiklaipeuh in hithei gige ana himawkw hi. Houpih ding tan leh houpih louh ding tan, limlakna (phone camera) zatdan ah, van, poimoh tuamtuam, online tungtawn a leinate ah baihlamtak a hon leisak thei ahih kawmkawm in, haksapi a i kaihkhawm sum leh paite baihlamtak mah in luangmangsak thei hi.

A tung a i gente' ban ah, adang tampi hiai a i genkhak louh leng om lai ding hi.

## 2. Bangchin i zang manpha dia :

i. Hohna, vakna, zinna i neih leh leng i tunna Chiangchiang *status/story/post* ahoihna leng om tham a, a pilvanhuaina ding leng om ding in ngaihtuahuai hi. Mi'n thilhoihlou bang hiam tum hile uh, i maban hiam, i nutsiat inn lam ah, thil poitheh ding om kha theh diam? chih bang ngaihtuah huai hi. Siatna toh kidim khovel a khosa i hihman in pilvan huai hi.

ii. A diak in, *whatsapp group* pawl tampite i nei uh a, pawl lian leh pawlneu, inkuan chih, unau, lawmta, beh group etc. hiaite khong ah i thugelhte, ana simkate' ading in thuhohi a mite lamtoutu ahi diam? Pathian hon sinsakna bang a chisoh tel itna toh ahi de aw? chih bang vel poimoh mahmah hi. Mahni hoihsak bangbang kuateng in mu ding? chih khual lou a gam gen mawk chih bang i kampau pen ana za, ana mute' apan lakik theinawn lou ding i hihman in, pilvanhuai mahmah hi. A tak hia? Zua hia? chih leng theihchet louhpite khawng a pesawntu (forward) hihkhak ding lauhuai hi. **Ephesate**

4:29 *"Thusia peuhmah na kam ua kipan pawt kei henla, a ngaikhete' a dia phatuam, taksap awnghu ahithethehna di'n, hihhatna ding a kiphamoh thuhohi kia pawt zaw hen."*

iii. I thangpahnate, mimal, insung vai leh sep-le-bawlina a haksatnate, buainate social media (*status/story/post*) a koihkhiak/phoulak tamlouh mite' hon zahtakna hizaw kha theh hi. Pathian mai a ahaksatna a buaina uh tunte, Pathian in hehpih a panpih zomah hi. **Mathai 11:28** "Nou semgim leh puakgik pote tengteng aw, ka kiang ah hong pai un, huchi in ken khawlina ka hon pe ding. Khut a i tawi theih Toupa' vualzawlina i tan vanzat manphate, ei hon thununtu ding hilou in, en i thunun zawk ding ahi. Tuabang ahihlouh Chiang in, inkuan khat hinapi lup hun thoh hun kibang theh nawnlou, ann nek hun tumta leng om theilou, inkuan maitam neikhawm theh nawnlou kia hilou in i vai tonkhawm theh nawnlou, chih bang a tun khak ding lauhuai mahmah hi. **2 Pet 2:19b** *"...Mihing lah amah zoutu thil khatpeuh' sila ahi ngal a."*

iv. I thil hihhoihte midangte i panpihna Pathian min a banghiam i kalsuannate phoulak gige nopna lungsim neih khak ding i zuihpa Jesu in hon sinsak dan hilou ahi chih i mangngilh khak ding lauhuai hi. **Matt 6:1** *“Na sabiak limsakna thilhihte uh mi’ muh ding lel a, mite’ ma a hihlou ding in pilvang un; huchilou in zaw na Pa uh van a om’ kiang ah kipahman na neikei kha ding uhi.”*

**THUKHITNA:** I la khat in “Zabung puak ding mangngilh lou, mangngilh hang la kik hamtang” ana chi a, tu hun a ding in, Mobile Phone puak ding mangngilh lou, mangngilh hang la kik hamtang” chih theih ding khop in, i hinkhua ah i taksa kahianga khat bang in poimohna lianpi nei hi. I khut ah michih in phone i tawi a, i insung ah a lianzaw TV i tung a, naupangte kepna leh donna ding a vanzat manpha leh poimohtak leng ahita hi. I bil a i zak leh i muhte’n nakpitak in a hon na thuzoh mahmah mai a, vualpawl nailou naupangchikte bang inleng i suk hekhak leh, phone apan in 911 (Police) No. ka call diam? hon chi thei uhi.

Lawm polh sang a melmuh tongsan (TV, Phone, I-pad etc) toh kikhawl tamzaw ahihtak

man in, a hoihna leng tampi om in, a hoih lou leng tampi mah sinkhe veve uhi. A vallua a screen et abik in piching nailou naupang neute’ khuak a ding in poina tun thei. Telsui mite’n a muh dan un, “Naupang neute’n TV/phone etna ahun a tam zatluat uhleh, thildangte’ mai a daitak in om kinken theilou ua, thil sinna toh kisai ah theihtheihna tasam uhi.” chi uhi. Hun teng hilou in, et hun deuh bang bikhiahsak thei leng manpha mahmah ding hi. Huchih kawmkawm in, khopi leh koihiam naupang Sunday School omlouhna mun a omkha naupangte leh hun hong pai zel ding a naupangte’ lak a i pau leh ham kepbitna leh Pathian thu amaute’ lak a chituhna hi thei ding limchin ei tualsuak a kizem (animation) Pathian thu pansan a Paite kampau zang a kibawl chihte bang a tamthei lam hong piang thei leh manpha mahmah ding hi.

I Laisiangthou in *“i hih khempeuh Pathian thupina dia i hih ding ahi” (I Kor 10:31)* chih hon hilh bang in, Toupa a pan i tan vualzawlnate Pathian tung a kipak kawmtak leh Ama min thupina hiding a, Amah hon lamet bang a zang manpha thupi semsem ding in Toupa’n hon vualzawl hen. ■

# BIBLE STUDY



**Pastor Thuamminlian Guite**

**Text : Philippite 1:12-30**

**Thupi : HUN TENG A KHRIST' A DING A HINNA**

**T**hupatna: Kha paita in Philippi saptuamte'n Tanchin Hoih dalhzakna dia a kithuahpih ziak ua Paul in kipahtu a genna leh amaute adia a thumsakna i sinta uhi. Tutung in Philippite 1:12–30 sung ah Paul in gingtute Khris't' deihna bang a hinkhua zang dia a hasuanna thu i sinkhawm ding uhi.

Kha lui a i gensa bang in tutung Bible Study ah tangte leh thumalte hilhchetna bawllou in, a thutun leh a bik in Missions lungput (Missional Hermeneutics) nei a sim sawm i hi. Bible simdan chi tampite lak a khat ahi a, a lunglut leh theihbeh nuamte'n, laibu tampite lak ah, hiai laibute pansan theih ding hi: Michael Goheen' laibu *Reading the Bible Missionally* leh Roji T. George' gelh *Called Into the Mission of God*. Ban ah, Dean Flemming' laibute *Self-Giving Love (Philippians)* leh *Foretaste of the Future (Revelation)*.

**Paul' Saltanna – Tanchin Hoih Khanna (12–18):** 12 *Unaute aw, tu in ka tung a thil hong tungte, Tanchin Hoih a khanna dia hong tung ahi uh chih na theih uh ka deih;* 13 *Huchi in inpi*

*veng pawl tengteng leh adang tengteng kiang ah Khris't' ziak a kolbun ka hi chih a chiangta hi. 14 Ka kolbuhna a kipan a Toupa muanna nei in unaute lak a tampite laulou a Pathian' thu gen ding in nakpitak in a hong hangsan deuhdeuhta uhi. 15 Khenkhatte'n hazatna ziak leh thangpaihna ziak in Khris't a tangkoupah ua; khenkhatte'n hoih a sak ziak un a gen uh. 16 Pawlkhatte'n itna ziak in, Tanchin Hoih dikdan gen dia om ka hihdan thei in a gen uhi. 17 Himahleh pawldang in kikhenna ding in Khris't a tangkoupah ua, a taktak hilou in ka kolbuhna a ka thuakna behlap tum in. 18 Bang a poi a? Kong bangkim a Khris't a kigenkhiak photleh akhem hi in atak hitaleh, huai ah ka kipak hi. Ahi, ka kipak zellai ding hi.*

Paul in a saltanna leh thuaknate Tanchin Hoih khanna ding ahi chi hi. Paul in hun teng in Tanchin Hoih genna ding hun lemtang bawl gige hi (Nas. 26). Suangkul a a omsung in Paul in suangkul vengtute kiang ah theihpihna nna sem ahihdan muh theih hi (t.13).

Paul in hiai bang a hangsantak a Tanchin Hoih a genna in midang tampite Tanchin Hoih gen di'n hanthawn hi (t. 14). Paul in Tanchin Hoih nasepna pen mimal khat hahpanna a sep zoh ding ahieh louhdan muchian mahmah hi. Pangkhawm a Pathian' hotdamna thu gen ding hizaw hi. Huchih lai in, Tanchin Hoih gendan tuamtuan om thei hi (15–17). Tanchin Hoih gendan chi tuamtuanthe ahiehleh: hazatna ziak, thangpaihna ziak, hoihsak ziak, itna ziak, chihthe ahi. Hiai bang a Tanchin Hoih gen pawl khenkhat in kikhenna di'n Khrist a tangkoupah uh chi hi (t. 17).

Bangchi bang lungput nei in Tanchin Hoih gen in om mahleh Khrist min genkhiak a a om photleh kipak hi (t. 18). Paul in sinsakna diklou pen ngaikhawklou hilou hi. A laikhak tuamtuanthe ah sinsakna diklou a ngaikhawklou muh theih hi (Romte, 2 Korinthte, Kolosate, 1

Timothi). A gen noppen ahiehleh Khrist min gen ahieh nakleh kipak veve hi. Hiai in Pathian' Mission ah Paul a lunglutdan muh theih hi.

Hiai apan sinlai thupi mahmah muh theih ahiehleh, Pathian' nna sepna pen kidemna leh kitaitehna hilou a pangkhawm a sep hizaw hi. Baptispa Johan hikhua ah leng hiai muhtheih hi. Baptispa Johan' nasep lai in Jesu in leng Pathian' kumpigam gen in, a nungzuite'n mi baptist uhi. Huchih lai in Baptispa Johan' nuzuite'n Johan kiang ah, *“Rabbi, Jordan gal a na kiang a om, a thu mi na theihsakpa'n, ngai dih, mi a baptist a, mi tengteng a kiang ah a hong pai uh,”* a chi uhi (Johan 3:26). Thugentu khat in hiai bang in gen hi: *“Pathian' gam nna na sepna ah midangte lohchinna na muh chiang in na lungsim tawng apan in na kipahpih thei na hiam?”* chi hi. Mimal kitawisang a, midangte lohchin ding lau a Pathian' nasem om theih hi. Jesu mah in leng Mark 9:40 ah, *“Kuapeuh ei hon doulou i lam a pang ahi,”* chi hi. Pathian' nasepna ah midang khat hong lohchin hiai hiai chiang in hazatna toh i enkha maimah hiam chih kivel tuak hi.



**Khrist adia Hinna (19–26):** 19 *Na thumnate uh leh Jesu Khrist Kha panpihna ziak in hiai ka suahtakna hong suak ding chih ka thei hi.* 20 *Ka gintak taktakna leh ka lametna bang in bangmah ah hihzum in ka omkei hial dia, himahleh ahi gigesa mah bang in tu in leng ka hinna hiam ka sihna hiam in ka pumpi ah hangsanna kim toh Khrist hihlet in a om ngeingei ding hi.* 21 *Kei a ding in zaw hin Khrist ahi a, huan sih leng punna ahi.* 22 *Himahleh sa a hin ka tan ding hitaleh kei a ding in sepgim gah tampi suahna ding ahi. Hinapi in ka tel ding pen ka theikei.* 23 *Nih kalteh in hamhaihtak in ka om hi. Paimang a Khrist kiang a om utna ka nei a; huai lah nakpitak in a hoihazaw ngal a.* 24 *Himahleh noute ziak in sa a om phot a kiphamohzaw hi.* 25 *Huchi in hiai ginna ka neih ziak in, ka om phot ding chih ka thei; ginna a na khanletna ding uh leh na kipahna ding un, na vek ua lak ah ka om phot ding hi;* 26 *Huchi a na kiang ua ka hong pai nawn ding ziak a Khrist Jesu na suanna ding uh tam semsem kei a na neihna ding un.*

Tang 19–20na ah, Philipp Saptuamte' thumna ziak leh Kha Siangthou tungtawn a suahtakna (hotdamna) muh ding lametna

Paul in nei hi. Hiai a suahtakna in taksa hotdamna (hing-le-dam a suangkul pawtsanna) leh khalam hotdamna (sihna tungtawn a hinkhua apan suahtakna) gen thei tuaktuak hi. Bangteng hileh Paul in a hin in hiam, a sih in hiam Khrist' min letsak a a om ding chi hi (t. 20). Paul in a hinna Pathian' khut a om ahihdan leh Pathian in a tangtawn thiltup a hinna tungtawn a suktangtun a om ding ahi chi hi. A hinkhua a a thiltup thupipen ahileh ama' hinna humbit a om ding sang mah in Khrist pahtawi a om ding chih hizaw hi. Paul in a hinna sang in Tangchin Hoih dalhzak ding ngaihkhawkzaw in nei hi.

Tang 21–24 ah Paul in Missions a etdan tomkimtak in taklang hi. Tangchin Hoih nasepna ah Paul in a hinna nakpitak a zang ahihman in gimthuakna leng nasatak in thuak hi (t. 22). 2 Korinthte 11: 23–29 ah Paul in Tanchin Hoih ziak a thuaknate hiai bang in gen hi: Suangkultang, akan-aval a vuakna, tamveipi sih lauhuaina, Juda-te lak ah vuakna khatvei a sawmli chinglou ngavei, thumvei Chiang a khet, khatvei suang a den, thumvei longsiatna, zan khat leh ni khat tuipi ah taihman, khualzinna ah tamveipi lauhuai, suammite

lak ah lauhuai, a chipihte lak ah lauhuai, Jentel-te lak ah lauhuai, khopi ah lauhuai, gamdai ah lauhuai, tuipi ah lauhuai, unau takloute lak ah lauhuai, sep tawlina leh sepgimna, ihmüt mohna tamveipi, gilkiäl leh dangtakna tamveipi, khosik leh vuaktang a omna. Hiaite ban a kigen lou tampi leng om hi. Hiai bangteng thuk mahleh, Paul mah in 2 Korinthte 4:16–18 ah muh theihte enlou in, thil muh theihlouhte a etzawk ziaak in bahlou ahihdan gen hi.

Tang 25–26na ah, Paul in hing-le-dam a om ding ahihdan theihchetna nei ahihdan gen hi. Hinna leh sihna toh kisai in deihtelna piak a om hileh, Paul in Khrist kiang a om a lunggulhthu gen hi. Haksatna naktak thuk ahihman in Paul in leitung nutsiat a Khrist kiang a khawltawldam lunggulh mahmah ding hi. Hiai bang ahihman in thupukna lak ding haksä sa hi. Himahleh, Tanchin Hoih nasepna leh Saptuamte a et chia'n hing-le-dam a a omlai poimoh sa hi.

**Tanchin Hoih toh kituak Hinkhua zang ding a Sapna (27–30):** 27 Na omdan uh Khrist' Tanchin Hoih toh kituaksak photphot un; honghoh a, nou hong

*muh hiam, ahikheileh ka omlouh a leng kha khat a na dinkipdan uh leh lungsim khat nei a Tanchin Hoih thugin a na pandan uh, na tanchin uh ka zak theihna ding in. 28 Huan bangmah ah na melmate uh hihlau in omkei un. Huai amau' a ding in manna ding kichetna teltak ahi a, himahleh nou a ding in hotdamna ding kichetna ahi, huai Pathian a kipan ahi. 29 Hiai tuh noute a ding in phal ahita; Khrist gingtate kia hilou in, ama' ziaak in na thuk sam ding uh. 30 Keimah a na muh uleh na zak uh huai kidouna mah na dou ding uh ahi.*

Tanchin Hoih dalhzakna di'n Saptuamte Khrist ah kibulphuh poimoh mahmah hi. Thugentu khenkhatte'n Tanchin Hoih khanna ding daltu lianpen gingtute' hinkhua ahi chi'n gen uhi. India ah Missionary-te tungtawn a Tanchin Hoih gen a a omlai in gingtu tamtakte' hinkhua ah Khrist mel langlou hi. Hiai in India ah Tanchin Hoih khan ding naktak a dal a om ahi, chi'n khangthu sutmite'n gen uhi.

Tanchin Hoih dalhzakna di'n Missionary-te' thugen a poimoh zahzah in, gintute' hinkhua poimoh hi (t. 27). A kuankhete' mohpuak kia hilou hi. Paul in

Philippite' Saptuamte kiang ah *Na omdan uh Khrist' Tanchin Hoih toh kituaksak photphot un* (t. 27) a chih in, Missions nasepna ah thugen kia hunlou a gingtute' hinkhua ah Pathian' lalna muh theih a a om ding ahi. Ginglounge' n gingtute' hinkhua a Khrist a muh theih ding uh chihna ahi.

Tang 28–30na ah Paul in hangstantak a Khrist adia theihpihna nna sep ding ahihdan gen hi. Tanchin Hoih nasepna ah doudalna leh haksatnate om ding mah ahi. Gingu masate leng gim tampi thuak a Pathian' gam lut ding in kiasuan uhi (Nas. 14:22). Tanchin Hoih ziak a thuakna leh sepgimna nna pen Pathian apan thawnpiak i muh bang hial in Paul in gen hi. Tang 29na a *phal* kichi a paubul ah *hehpihna* toh kibang hi. Huai ahihman in, Tanchin Hoih ziak a thuakna pen Pathian in a hehpihna ziak a phalsak a om, huai tungtawn a Khrist' hinkhua gingtute lak a lahkhiak a om ding chih genna ahi. Huai kidouna a tel ding in Philippi saptuamte sap in om uhi (t. 30). Huai tungtawn in Tanchin Hoih khansak in om ding hi.

**THUKHITNA LEH SINLAI:**  
Tutung a i sinlai un a tuppen ahihleleh gingtute' hinkhua

ah bangteng tung mahleh Pathian' Mission sepsuahna a masapen a koih ding ahi. Paul sungkul sung ah khum in om mahleh Tanchin Hoih khumbichilh in omlou hi. Gingtute' hinna leh sihna in Khrist a pahtawi ding ahi. Huai di'n mimal hamphatna sang in Pathian' Mission a masakzawk ding ahi. Tanchin Hoih genna ah haksatna leh sawina om mahleh, huaite Khrist' thuakna gingtute'n i koppihna uh ahihman in Pathian apan hehpihna hizaw hi. Mite'n eite' hinkhua hon sim uh ahihman un, thugen sang in hinkhua in gen ngaihazaw hi. *I omdan uh leh Khrist' Tanchin Hoih a kituak na hiam* chih kivel ding in simtute i kichial uhi.

### **Kivelna ding dotnate:**

1. Tanchin Hoih theihpihna nna na sep ding chiang in bang in hon dal in na thei a?
2. Khrist' theihpihna nna nang a di'n na koihkha ngei hia? Missionary-te' a ding bik in na koihkha hia?
3. Tutung i buaina hun ah mite'n eite' hinkhua ah Khrist' lalna mu ding un na gingta hia?
4. Paul in a gen bang in, na hikhua ah bangchi'n Khrist pahtawina hinkhua na zang thei dia? ■



# Gammial Aw

*Mangthangte zong a hondam ding a hongpai i Toupa leh hondampa Jesu Khrist min in Gammial Aw simtute chibai aw! Toupa gam nna sem a saptuamte'n tuni chiang a i kalsuannate muih mailou a sunzom thei lai i hihdan muhtheih a omte ziak in kipahhuai i sa hi. Khovel mun chih mualchih ah gingtute sawina leh gelgawtna muhtheih ding hong om zelte'n a chang in lungliapna bang ei gingtute lak ah hon tun khathei ding a batchang om mahleh Pathian in a hunhun a A thilhihtheihna hon muhsak zelte ziak in i ginna a dinkip poimoh semsem ahih dan hon musak hi. Saptuamte'n field tungtawn leh pawldang toh i sepkhawmnate ah a changchang in haksatna bang semtu Missionary-te'n a phutkhak chang uh om thamtham ding ahi chih i haihkei a, himahleh, Pathian in A misiangthoute thumna tungtawn a a hunhun a nna thupitak hon sepsak zelte ziak a field a mavang leh bittak a semthe zel i hihdan i thei a, thupi i sa hi. Field tungtawn a nna kisemte leh Toupa'n gah hon piaknawn hiai a nuai ate enkhawm nawn ni.*

## A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n thumnate ziak in field a kalsuanna tungtawn in gingthak nih leh baptisna tang thak sagih hon piaknawnte ziak in kipathu gen ni. Gingthak leh baptisna tangthakte a khalam uh naupangchik ahihman in a khalam kalsuanna ding uah, hihbuai thei tuamtumte lak apan kuhkal leh chitak a gingtu muanhuai hong hih zel theihna ding un thumpih ni. Khateng a field tungtawn a sepna gah kipahhuai taktak muh a omzelte ziak in Pathian kiang ah kipathu gen ni.
2. Memeng biakin kumlui September 28, 2024 a menchim in hon suksiatsak himahleh Pathian hoihna leh chitna ziak in biakinn tunkhiak in om nawnta hi. Biakin bawl zoh ahihtak toh kiton in Pathian min thupina ding in February 26, 2025 in Rev Dr Thangminlun Mangte, Field Superintendent in honna leh latna nei hi. Toupa'n Amah bia a gingtute paikhawmna Biakin hon kepbitsakna ding in thum ni.

3. NEBC Leadership Seminar tanggam lam ah February 25, 2025 leh phaizang lam ate a ding a February 27, 2025 neih a omte lamzang leh lohchingtak a zoh a om theih ziak in kipahtu gen ni. Hiai hun a kisinsaknate'n field a gah thupitak a hon suahna ding in thumna toh delhzui ni.
4. March 31 apan April 12, 2025 sung kumteng a field in a neihzel Basic Bible School Bhudabare, Nepal Biakin ah neih hi ding hi. Hiai hun ah thupi tuamtuam zang in sinsaktu mi 14 te'n sinsak ding uhi. Hiai bang kisinsakna hun pen tunung a Saptuam heutu ding tuailaite sekna hun hoihtak ahihman in Toupa vualzawl program ahih theihna ding in thumna in phawk ni.
5. Field Dorka Pawl in kum thum dan a Field Khawmpi a neihzel uh tukum in leng April 28-30, 2025 sung Birtamode ah neih in om ding hi. Khawmpi hun ah thugentu in Miss Dr Niangsangching, Lectuer, GBC leh Rev Dr Thangminlun Mangte, Field Superintendent ban ah Seminar hun Mrs Ching Mangte in la ding hi. Khawmpi gahsuah leh manpha ahihna ding in thum ni.
6. NEBC inntuan ding a vaiguan paizel ah tukum 2025 apan amau heutu ding kitelsak a, amau khut ah thuneihna bangtanhiam piak ding chih ahihman in Field Khawmpi June 9 – 11, 2025 sung Birtamode ah neih a om hun in kitelna om ding hi. Khawmpi gahsuah leh lohching ahihna ding in thumna toh delhzui ni.
7. Field sung a semtute'n salam chidamna hoihtak, lungsim leh kha damna banah khamangthang itna, veina puakgik Toupa apan tatsatlou a a muh leh tanzel theihna ding un thum ni.

## **B. DHEMAJI MISSIONS FIELD**

### **KIPAHTHU GENNA LEH THUMNA DINGTE:**

1. Field a semtute kalsuannate thawnlou in Pathian in EBCC Kapurdhuwa leh Bongalmari station apan gingthak leh baptisna tang ding hon piak ziak in kipahtu gen ni. Field nasepna in khanlam nawtzel a theih ahihman in kipahtuai i sa a, lamzangtak a semtute'n Khasiangthou ompihna toh hon sepzom zel theihna ding un thum ni.
2. EBCC Amguri a om gingu Mr Arjun Kuli tanu Esther Kuli hun bangtanhiam damlou a om Pathian in i thumnate hon dawng in tu in damsiangta hi. Kipahtu gen in, damna a ngahna tungtawn a Pathian thupina tamsem a muhna hong hihna ding in thum ni.

3. Nahorbari Fellowship mun ah Ali Aye Ligang festival tungtawn a ginglou tamlou omte kiang ah semtute'n tangthupha genna hun a zatpih theih ziak un kipahtu gen ni. Ginglou mite'n a thuzak uh tungtawn a Pathian diktak hon theihna ding un thum ni.
4. Field a gingtute lak ah thilpiak petu ding hong kibehlap zelte ziak in kipahtu gen ni. EBCC Morahuti a sawm-a-khat leh Missionary vakna a pangthak gingute ziak in leng kipahtu gen ni. Amaute'n ginom leh chihtaktak suah a thilpiak hon supzop zel theihna ding un thumpih ni.
5. Station tuamtuam a semtute sepna mun a mite'n Pathian thu a dangtakna hon neih ua, tua tungtawn a amaute tanchinhoih thu zaksak a a om theihna ding un thum ni.
6. Mr Unjir Regon leh innkuante (Pityang Chapori) Pathian thu a lunglutna a neihziak ua semtute'n a houlimpihna tungtawn ua hotdam hong hihtheihna ding un thum ni.
7. Bitarbacha station ah Biakin leh Study Centre kithuah nasepna lamzangtak in paille hi. Hiai station pansan a tunung a tangthupha genna a i pansan ding mun ahihman in Pathian pina leh Khasiangthou nasepna i ngahna mun ahihna ding in thum ni.
8. Pityang Study Centre a kai naupangte'n Jesu Khrist tanchin theih utna lungsim a hon neihna ding un thumpih ni. Amaute'n semtute kiang ah thumna neihsak ding a ngetna bawlthei panpanta ahihman un thumsaknate tungtawn a Khasiangthou in na a sepna ding in thum ni.

### C. HOJAI MISSIONS FIELD

#### KIPAHTU GENNA LEH THUMNA DINGTE:

1. Hojai leh Lanka a semtute' tate leh tuition naupangte'n final exam buaina omlou a lamzangtak a zouthei ahihman un kipahtu gen ni. Hiai station nihte pansan a semtute'n leng amau mohpuakna chiat hon sepzom zel theihna ding un thumpih ni.
2. Semtute'n Year Plan a a guan bangbangte uh khatkhit khat in semzom theizel uh, kipahtu gen ni. Maban a Year plan thak guan a omte gahsuahtak a hon sepkiak theih nawinna ding un thum ni.
3. Hojai a gingtu inkuan nih omte'n a khalam pianthak ni uh February leh March in lopna nei uhi. Amaute a khalam uh hong

pichin sem ua, ginglou mite a ding a ettontak Khrist nungzui muanhuai hong hihna ding un thumpih ni.

4. Lanka station ah Counselling neihpih a om Mrs. Laxmi Devi leh tuition naupangte leh a inkuante a ding in thum ni. Amaute kiang a tangthupha zaksak ahih theihna ding in leng thumna toh delhzui ni.
5. Hojai station ah fellowship hun a kihel zel gingloute leh Outreach Ministry tungtawn a tanchinhoih zaksak a omte'n a thuzak ua pan hotdamna hon ngah theihna ding un thum ni.

#### **D. GOALPARA MISSIONS FIELD**

1. Dhupdhara Station a Football Coaching tungtawn a semtute'n a kalsuanna uh session khat buaina omlou in zou theita uhi. Kipathu gen in, session thak April khasung a patnawn ding a sawm uh, lamzangtak leh lohchingtak a hon sutzop ua, coaching tungtawn ngei a tanchinhoih genkhiak a hih theihna ding in thum ni.
2. Semtute'n Community Health Care Project pansan a a sepna maban uh a sutzop zel theihna, a gammite toh kinaihazawk sem ahihna ding in thum ni.
3. Balijana station ah semtute'n sepsuah ding Project a neihte uh lamzangtak in semzom thei zel uhi. Maban ah sepding leh kalsuan ding dan a hunhun a Pathian pina toh hon sepzom zel theihna ding un thumpih lai ni.

#### **E. KAMRUP DISTRICT**

##### **KIPATHU GENNA LEH THUMNA DINGTE:**

1. Semtute'n Toupa gam nna sem a kalsuanna uh subuaitu omlou a tuni Chiang a kalsuan sutzop theih ziak un kipathu gen ni. Pathian Khasiangthou thopna leh makaihna toh lamzangtak a kal hon suan zel theihna ding un thum ni.
2. Hun paisa a semtute'n a houlimpisate uh sunzom theizel ua, khenkhatte Pathian thu toh houlimpih theih a omta ahihman un kipahhuai i sa a, thumna tampi toh amaute delhzui ni.
3. MrsRojetaRabhalehinnkuantetohsemtute'n kimeltheihtuahna a neihna tungtawn ua amaute Pathian thu genpih ahih theihna ding un thumna in phawk ni. Mr. Diganto Rabha & Mr. Hongkhoram Rabha leng taksa damlouna a neih ziak un

- semtube'n vaveh zel ua, veh ahihna tungtawn a Pathian thu genpilh theih in om panta hi. Pathian thu a houlimpilh sutzop ahilh zel theihna ding leh Jesu Khrist a hondampa ding a hon saan theihna ding in thum ni.
4. Chhaygaon station ah doudaltu tam mahleh buaina omlou a kalsuan theih a om zel ahihman in kipahthu gen ni. Hia mun pansan a semtu i neihte'n kuhkaltak leh taimatak a hon sepzom zel theihna ding un thumpilh ni.
  5. Bamunigaon station ah Pathian thu a houlimpilh theih ding kibehlap zel a, kipahhuai i sa hi. Mrs. Ronjita Rabha leh atapa Mr. Mhrimoy kiang ah Pathian thu genna sutzop ahilh theihna ding in amaute houlimpihtu semtube leh houlimpilh a omte lungtang a Pathian in thu a genna ding in thum ni. Khalam a dangtak mi tamsem Toupa'n hon piak a, khamangthang tamtakte a khebul tut ahilh theihna ding in ngen ni. ■



## DORCAS *Corner*

Khristian Thukizakna simtube tengteng leh munchih a om Dorka pawlte, i Toupa leh Hondampa Jesu Khrist min in chibai k'on buk masa hi. Pathian in i heutute tungtawn in Dorcas Co-ordinator mohpuakna hon pia a Pathian tung leh i heutute tung ah kipahthu ka gen hi. Chikmah a totkhak ngei nailouh lampi tawn ding ka hihman in, saptuam mipite'n n'on thumpihna uleh hanthawanna ka poimoh gige hi. Hiai mohpuakna piak a ka om in Pathian in Joshua kiang a a thupiak, *"Lau kenla lunglel sam ken, Toupa na Pathian na paina teng ah na kiang a om ding ahi."* (Joshua 1:9) chih lungsim ah hong om a, hiai in hon khamuan tuan mahmah hi. Huaiziaik in, Pathian ompihna leh noute hon thumsakna dingte ziaik in lungmuanhuai ka sa hi.

DOTPROJ – 7<sup>th</sup> Batch:- Dorka Pawl in puankhui i zilsakte uh Batch 7nate Graduation Day March 20, 2025 in Dorcas Jubilee Guest House ah lohchingtak in zat in om hi. Tutung a puankhui zilzou mi 13te kiang ah Puankhui khawl leh certificate piakkhiakna kinei hi.



**DORCED huhna** :- Tukha in DORCED huhna EBCC New Kangkap Dorka Pawl apan in teng 2000/- honglut a i kipak mahmah hi. Toupa'n amaute tamsem in vualzawl hen aw. Hiaitan honpi Toupa min phat in om hen. ■



# YOUTH *Corner*

## TUAILAI KHAWMPI

EBC Tuailai Khawmpi ahihleh kum 5 hal a kineizel khawmpi ahi. EBC saptuam sung a tuailai tengteng kikhophkawmna hunpi khat ahi. Hiai Khawmpi tuailaite khantouhna leh kikhenna dia poimohtak hun ahi; Laisiangthou a kibulphuh kisinsakna leh nuntak dingdan kisinsakna hun ahihman in. Kum 1968 a mawlhchik a a kipatkhiat apan tuni tan dong in, Tuailai Khawmpite'n tuailaite khalam hinkhua lamtouna leh gamsung kikhekna ding in a semtou gige hi. Khawmpi Thupite'n paidan khat a nei ua, geelkholhsa bangkhop in zuihpi khat a nei uhi. Toupa Jesu "Nagotna Thupi" a laizang ah a om gige hi. Kha Siangthou pina ahi i chilou theikei hi. Thugenna hunte hi in kisinsakna hunte hitaleh, Toupa'n nasatak in hon zatsak gige a, tuailaite leh i gam mahmah ah kikhenna khatbek tungsak zel hi.

**TUAILAI'87** in kikhekna thupitak hon pawkhia hi; nidang-hundang a zatdan ngeina banglou deuh in hiai khawmpi kizang a, kuapeuh in thupi leh ettonhuaisa chiat uhi. Hiai zohnung a khawmpite'n **TUAILAI'87** etton in neitou uhi chilehang i chikhial lawkei ding. Tua banah, "**Tuailaite Khrist ading in**" chih thupi in nei a, tuailaite Khrist nungzui ding a a piilpi a kisinsak leh kihanthawwna masa hong suak hi. **TUAILAI'90** in Khrist nungzuihna a kalbi khat suantou in "**Tuailaite midangte aa ding in**" chih thupi in hon nei hi. Hiai khawmpi in Khrist min a phatuamngaihna leh kipumpiakna hon genkhia hi.

**TUAILAI'95** in Khrist nungzuite Missionary a kuankhiat ding tupper a nei in "**Tuailaite Gamla Ding In**" chih thupi in hon nei tou hi. Tuailaite missionary lungput neihna dia kalbi poimohtak khat hong suak hi. Huchi in, **TUAILAI2000** in hiai mission lungput sephiatna ding in pan

nasatak in honla a **“Tuailaite Missionary Ding In”** chih thupi in hon zang hi. Hiai khawmpi a chiamtehtham khat ahihleh tuailaite lak a *‘10/40 window’* genkhiatna masapen kinei hi. Tuailai2005 in tuailaite **“Kikhenna Tuntu Tuailai”** hiding in chouna nasatak hon bawl a, thupi in **“Tuailaite Khovel Kheng Ding in”** chih zang hi. Hiai khawmpi a chituamna ahihleh khalam kia hilou in, salam leh khotaang lam a khantouhna ding a kilamalahna hoihtak hon luikhia hi. Tuailai2010 in nungzuihna lam a kilamalahthakna ngaih poimohpen a nei in **“Extra-Mile for Christ”** chih thupi in nei hi.

**TUAILAI2015** ahihleh Khawmpi ngeina bang in kizangtheilou a, Khawmpi khangthu a ding in chiamtehtham hun khat hong suak hi. Hiai leng, Kha Siangthou’ pina i chilou theikei hi. Khawmpi dangte bang in sukkhak poimohtak hon nei a, tuailaite lak ah Khrist nungzuihna leh Khrist-batna nasatak in hon lakkhia a, **“movement”** melpu in tuailaite lungsim munkhat ah hon koihkhawm hi. Tunitan in, **TUAILAI2015** a kigenchiang in **“Diktatna”** toh gingkhawm denlai hi. Tuailai2020 leng Covid-19 pandemic ziak in ngeina bang in kineitheilou hi. Himahleh, Toupa’n lemgeelsa hoihtak neih ahihdan muhtheih in hong dawkkhe nawnzel hi. Hiai khawmpi a kigeeltung apan in, Khawmpi hunpi pen khawmpi ma a nasep tuamtuamte a khupna leh a lopna hiding in kigeel hi. Tup-le-ngim, leh sukkhak sawm kichiantak nei a geel ahihman in, Lockdown om mahleh nasep dingte lohchingtak in kizouthei hi.

Khawmpi a kumnawn (2021) in mawlchik in kinei mahleh, a sepkhiate tunitan in Toupa’n hon behlapsak lai hi. Global Missions a a lompi a i kihelna masa hong hi a, tuailaite lak a **“Nungzui Bawlna”** lungput chituhna masak leng hong suak hi. Tu in, Tuailai Khawmpi 2025 maituah dia i omlel laitak in, i nunglam i enkik a, Toupa’ hon pina thupi leh lamdangtakte i mu a, Amah’ min pahtawi in Toupa’n Tuailai2025 leng nasatak in hon zangding ahi chih i muangngam hi.

Tuailai2025 in **“Khrist leh A Gam Adi’n”** chih thupi a nei in, nungzuihna leh nungzuibawlna a kisinsakna, kilamalahna leh kuankhiatna tuppi pen in a nei hi. Gingtu piching, khalam angum nethei ding a khantouh ding a tup ahi. Toupa’n hunpha hon muhsak a, Ama’ thupina ding leh a gam a ding a Khawmpi lohchingtak a zat ahihtheihna ding in kuapeuh in thumna toh delhzui ding in ka hon ngen hi. Tuailai tamtakte ading a a khawmpi a tel khatveina hong hiding ahihman in, mimal in leng i kisakhol ding a, nasep ding leh kalsuanna ding omna munpeuh ah thanuamtak a pang ding in i kimansak chiat ding uh aw! ■



# Mu ic *Corner*

## AW SAWIZOINA DING A POIMOH KHENKHATTE (Vocal Warm-up Technique)

April 2025 hon pikai Toupa min i phat hi. March 2025 Music Corner ah abiktak in la leh music lunglutte a ding a poimoh mahmah "Hulakdan leh Khahkhiakdan" (*Breathing Technique*) toh kisai i gen hi. Tutung in ahihle, phatna la siasiam leh lapawl sate'n masawanna ding a poimoh alou theilou hih teitei ding "Aw sawizoina ding a poimoh khenkhatte" (*Vocal Warm-ups Technique*) toh kisai saulou in gen leng i chi hi.

Pathian phatna la siamtak leh la phuaktute gelhdan (*Interpretation*) thazohtak a sakkhiak ahihtheihna ding in "Aw sawizoina" tumlam gam lasasiamte'n a ngaihpoimoh mahmah uh enleng i ngaipoimoh panta ua, kipahhuai sa in masawanna khat ahi i chi louthei kei a Toupa min i phat hi.

Vocal warm-up thupi ngaihlouhna ziak in la sathei tampite'n "Aw bawm" (*voice box/larynx*) sesak pawl om a, aw liamsak pawl omsek uhi. Lasak lunglut mahmah voice box/vocal cords sesak kha lawmhoih mahmah Filipino-te ka theih om hi, Voice major subject la-ut mahmah, a ahihziak in a aw aliam ziak in latheilou suak hi. Amah a ding a teel ding omsun tuh, Applied Violin Class ah atel mai angai hi. La hing leh siamtak a, la in aphut dandan(*demand*) zahzah sakkhiak ahihtheihna ding in vocal warm-up exercise kisinsiam poimoh mahmah a lasa mite'n niteng a i hih ding ahi. Mahni a kisinsiamna ding leh aw toh kisai sinsaktute' a ding a aphattuum khakleh chihna toh bangzahhiam genleng i chi hi.

### 1. Vocal Training & Exercise a poimohna:

- 1.1 Pathian in lasaktheihna (*ability*) hon piakte'n vocal warm-up exercise tuamtuate i nelhsiah theilouh, niteng a i hihteitei ding ahi huai in 'Aw' damsak hi.
- 1.2 Pianken a lasiamlou hi a kithei, ahihziak a, lasak lunglut mahmahte'n hiai vocal warm-up exercise hoihtak in limsak in sinsiam le masawanna leh siamna hon tun mahmah ding.

- 1.3 Ball peksiam minthangte'n ball apek ding himhim uleh physical warm-up exercise aloutheilou a angaih bang un, Lasa siamte'n (*professionals*) leng hiai vocal warm-up exercise lasak ding chiang a kisakkhohlna masa aloutheilou bang in ngai uhi.
  - 1.4 Vocal Warm-ups in "Awgin Tehna" (*vocal range*), lungkimna bangtaka sak theihna, note sangte sakzohna, note niamte saksiamna, leh aw ginkhiaksak dan (*Tone Quality*) toh kisai ah masawanna hon pia ding hi.
  - 1.5 Vocal Warm-ups hoihtak a neih in lasa ding a zumluatna bang, lasak ding linlua lungsim gimna (*tension*) kiamsak in kimuannamna (*confidence*) neisak hi.
2. **Vocal Exercise poimoh khenkhat-te:**
- 2.1 **Aw-gin dik (*Correct Pitch*) kisinna leh a sanglam sakdan leh niamlam sak- (*Low & high range*) zohna ding a kisinna:**
    - **Lip Trills:** Na vocal range sung ah hu na diklutte khahkhiakna lam ah na muk pansan in buzzing sound pawtkhesak in, neulai a kimawlina ding a gari/motor lem i sawn chiang a aging ding i bawl bang in, solfa modulator note niam, laihawl leh sanglam sakdan kisinsiam ding, hiai in key/pitch dik a sakdan leh asang aniam sakdan *Voice control* ban ah vocal range extension toh kisai a hon panpih mahmah ding hi.
    - **Tongue Trills:** Lei (*tongue*) lingsak kawm a music Relative Scale zui a sakdan kisinsiam ding ahi. Hiai hihtam in thumalloh chiangsak hi. Hiai pansan in:  
(d-r-m-f-s-l-t-d'-t-l-s-f-m-r-d)
    - **Humming:** La haksaloute music scales a gingvuak, thumal genlou a (*humming*) a sakdan kisinsiam poimoh mahmah hi (d-r-m-f-s-l-t-d'-t-l-s-f-m-r-d).
    - **Nasal Sounds:** Nang = "**ng**" ging, hon, hong nak (*nose*) lam hahzatluat in aw gingkhia leh thumalloh chiangsaklou in nalhsaklou hi. Huaiziak in, "**ng**" ging saksiam dan kisin poimoh khatsuak hi.
    - **Staccato sakdan:** (^./.) music note tom-gin, sakmat chatchat a sak ding, voice control leh aw hatsakna toh kisai apanpih mahmah hi.

- **Legato sakdan:** La kaai leh maamtak, thumal lohndan Chiangtak a sakdan kisin ding ahi (*smooth and connect*).
- **Arpeggios:** sofa pansan in enle (d-m-s-d'-s-m-d, r-f-l-d'-l-f-r, m-s-t-r-t-s-m) *etc.*
- **Presto:** La tempo kintak a thumal lam leh kaitak a thumal lam kisinsiam ding ahi.

# **Niteng a kisinna ding:**

1. Dot (.) Aw sang zohna ding. (*Ooo,ee, hm gingte zang in*). *Phrase khat sakna dia Hu khatvei lak ding.*

**Etsakna:** (*Dot (.) zatna*) ld .r :m .f ls .f :m .r ld :s ld :- Ging kimkhat kaltou zel, kumsuk zel in sa in.

2. Dot-Comma (.,) hu khatvei na lak sen in sakdan kisinsiam in.

**Etsakna:** (*Dot Comma (.,) zatna*) ld .,r :m .,f ls .,f :m .,r ld :s ld :- Ging kimkhat kaltou, kumsuk zel in sa in.

3. Comma (,) Hu khatvei na lak sen in sakdan kisin in.

**Etsakna:** ld ,r :m ,f ls ,f :m ,r ld :s ld :- Ging kimkhat kaltou, kumsuk zel in sa in.



Aw hon petu phawk a, Amah itna thu leh phatna la kia sa a, A min thupina ding a hihtheihna tengteng a kisinsiam a kizang ding in Toupa'n siamna leh hihtheihna honpia hi. Kitaathiam semsem a, Lasa maimai hilou a, la leh music tungtawn a Pathian thu genkhia, pekha, sakhiate hithei ding in Toupa'n hon vualzawl hen. ■



# EBC Innsung Thu

1. **KIPATHU GENNA:**

EBCC Dialkhai in sound system poimoh chi a headquarters a ngetna, Ka hon bawl uh hon ngaih poimohsak a, ka hon nget bang ua sound box 2 leh amplifier 1 hoihtak, Dorca Hall in Director of Ministries leh heutute tungtawn a ahon piak ziaak un, KTZ tungtawn in kiphathu ka hon gen uhi.

- T/Upa H. Zamsuankham, *Secretary TBUC, EBCC Dialkhai*

## 2. KIPAHTHU GENNA:

Ka Keyboard zatlai uh a hong siat leh zat ding neilou a sawttak ka om nung un, Director of Ministry EBC Headquarters in pan hon lakpih in, EBCC Kolkata in kiphaltak in hon pia ua ka kipak mahmah uhi. Huaiziak in KTZ ah kipahtu ka hon gen uhi.

Toupa'n panpihngaite panpih thei zel ding in amaute vualzawl hen aw.

- **M. Tuankhansuan**, *Secretary BYFC, EBCC NE. Tlangnuam, Mizoram*

## 3. KIPAHTHU GENNA:

Toupa ompihna thupitak toh Saptuamte' thumnate ziak in Tuailai Hotdamna Camp, 2025 lohchingtak in 23rd February, 2025 in kizang zouta hi.

Hiai hun ah thugentu in Evan. Upa Lianding Guite pang a, campers tuailai mi 55 kipa hi. Hotdamna theichian a thupukna bawlthei mi 24 kipa a, piangthaksa kipaahna thak nei mi 15 vel kipa hi. Hiai bangtan a lohchinna thupitak toh camp hon zousaktu Toupa ahihman in thupina teng teng i pia ahi.

Hiai camp ding toh kisai a abul apat hon dinpih, hon buaipih leh atawp tan dong a hon nungthuap gige TBUC, EBCC Bukpi tung ah kipaahna lian petmah a amaute tung ah leng kipa thu ka gen uhi.

Tuaban ah, Lamka leh muntuam – gamtuam a om, hiai hotdamna camp ding toh kisai a sum-le-pai a hong pangte tengteng tung ah leng ka kipak petmah ua, i Hondampa Toupa'n aleh tampi leh athupi zawsem in hon vualzawl chiat leh chih ka thumna uh ahi.

Tualsung saptuam a department tuamtuamte banah Saptuam innchihte leng hiai camp ding toh kisai a nakpi a panlakha chiat i hih ban ah camp neihna ding mun-le-mual vanzat poimoh bangbang hon zangsak Bukpi Govt. High School tung ah kipaahna lianlua ahihman in KTZ tungtawn in kipahtu ka hon gen uhi.

Toupa'n ama uh pii henla athupi zawsem in hon vualzawl leh chih ka thumna uh ahi.

Khrist leh Saptuam din.

- **Lalmuan Guite**, *Chairman & Vumsuan Naulak, Secretary* ■



# Ordain Sunna

1. Min: Upa Joel G Hangzo
2. Pianni: April 28, 1961
3. Pianna Khua: Kaihlam
4. Baptisma tanni: June 6, 1975
5. Pa Min: (L) Pastor H Thualkhothang
6. Nu Min: Manzangai
7. Zi min: Damneihching
8. Kitenni: November 29, 1991  
Kitengsaktu: Pastor T Kaikhotuan
9. Gil a gah goutan neihzah: 4, Pasal: 1, Numei: 3
10. Tulel a omna Saptuam: EBCC Lamka Baptist Church
  1. Tulel a kizatna: TBUC Member
12. Ordain Kum: Dec. 12, 2004 Petu: Rev Dr. B. Luaichinthang
13. Pahtakna lai san kum: Active
14. Toupa kiang a tawldam ni: February 18, 2025 Vui ni: Feb. 19, 2025
15. Vuitu Pastor & Saptuam: Pastor S Thualgouthang, Local Pastor
16. Natna: Cancer



17. **A TANCHIN GELBEH NOP: SAPTUAM A KIZATNA:** Local Committee ah 1996 apan member ahi a, EBC Kumsim Khawmpi 56na, Hiangtam Lamka ah December 12, 2004 in Rev Dr Luaichinthang in Upa in Orden hi. 2011 in TBUC Asst Secretary len hi. 1990 apan Naupang Nipi Skul sinsaktu in pang a, 1997-99 sung Superintendent ahi. 1989 in KTP makai in pang a, Secretary (1993-94); 1995 in Chairman ahi. Kum 2002 apan Mission Committee ah pang a, 2008-2010 sung Secretary leh 2017-2019 in Chairman len hi. Lamka Baptist Church (biakin thak) ah Secretary masapen ahi.

Hiaite' ban ah 2007-2019 sung DWC/DEC ah Member hi a, EBC HQ ah BOT/CEC member leh Central Mission Sub-Committee ah term 4 tuak ana telkha a CMSC ah term 2 (2018-2023) Chairman len hi. Jesu Khrist Tangthupha puanzakna awlmoh in kha mangthang vei mahmah a, EBC Mission Field teng vehsuak in, mission agency tuamtuam, IEM, FMPB, OMF, SIM, WEC etc toh kisaina ah leng saptuam makaite nungzui kha hi.

**DAMLOUHNA & HUN NANUNG:** Nek-le-dawn, niteng hinkhua ah Upa Joel mi kithununtak ahi a, zunkhum nei ahihdan kitheikhia in, zingteng khovakma apan biakin tawn in walking gige hi. May 2023 tawplam in stroke nei hi. Ki-ensak ding in a zi toh Delhi ah va ki-ensak thei uhi. Biakinn program ah a peih dandan in hong kihel nawn thei hi. Hong chau hiahiai a, District Hospital ICU ah lungtang natna nei ahihdan theihkhia in om hi. Sisan piakzel hi a, test tuamtuam apan cancer ahihdan doctor in musuah hi. Inn leh hospital kawmtuah in hun bangtanhiam a ki-etkol in nung in February 18, 2024 sunnung dak 12:45 vel in Toupa kiang ah tawldamta hi. "...Khrist kiang a om...nakpitak in a hoihzaw." -Phil. 1:23.

Toupa Khasiangthou in a nutsiat a inkuan leh saptuamte khamuan in makaih hen. ■



APRIL 2025

## *Kipahthu Genna leh* THUMNA DINGTE

**1 SEPNAWNNI:** GBC in Spiritual Emphasis chih thupi pansan in April 1-2 sung hun zang ding uh, Rev. K Kamchinkhup General Secretary EBC, Upa Jamdouthang Guite, leh Rev. Gin Malsawm, Principal GBC thugentu in pang ding uh. Manpha leh gahsuahtak a zoh ahih theihna ding in thumpih ni. DoTProj tungtawn a nasepna in masawnzal April ni 3 in Batch 8na in class pannawn ding uh, lamzang leh lungluttak a hon zil theihna ding un thumna ah phawk ni.

**2 NILAINI:** GBC in Ministerial Training Course (MTC) sinlelte a ding in April 3-4 sung Seminar nei ding ua, hiai hun ah sinsaktu in Rev. K Kamchinkhup General Secretary EBC, Rev. Gin Malsawm, Principal GBC leh V Thangoumang, Coordinator GBC pang ding uh, a kihel ding mite leh sinsaktu dingte thumpih ni. April 4-6 sung ZCBC Zoveng in chialpi nei ding a, Rev K Kamchinkhup, GS thugenpi in pang ding, chialpi lohching leh gahsuahtak ahihna ding in thumpih ni.

**3 NINGANI:** April 4-6 sung EBCC D Leikot in Hotdamna Chialpi nei ding a, Evan Upa Lianding Guite thugenpi in pang ding. Hiai hun toh kituak mah in NTBC Pamjal in Chialpi nei ding a, Evan Upa T Damkthothang thgenpi in pang ding, thumna ah phawk ni.

**4 SINTAWPNI:** April 4-6 sung Sialkal Division in Division BCD Khawmpi 41na EBCC Teikhang ah nei ding a, Rev M Ginminthang, Child Co-ordinator

thugenpi in pang ding a, kitaitehna tuam tuam leng sai ding uh. Khawmpi lohching leh gahsuahtak ahihna ding in thumna ah phawk ni.

**5 KIGINNI:** April 6 in EBCC Elim Veng in Thanks Giving Day zang ding a, Rev N Tuang Lang, DS Lamka East in Pathian thutak gen ding, thumna ah phawk ni.

**6 NIPINI:** April 7 in GBC in Graduation Service zang ding, thugentu in Dr Bennet Lawrence pang ding hi. Manpha leh lohchingtak a zat ahihna ding in Pathian ompihna leh makaihna ngen in thum ni. April 7 in saptuam skulte lutnawnta ding uh, sintute leh sinsaktute a ding in Pathian makaihna ngen in thumpih ni.

**7 SEPPATNI:** April 7-8 sung EBCC Hiangtam Lamka in Upa Bial Orientation nei ding a, Rev Dr S Vung Minthang sinsaktu in pang ding, GBC in Faculty Orientation April ni 8 in nei ding ua, Rev. Gin Malsawm Principal GBC sinsaktu in pang ding, hiai orientation hunte a sinsaktu dingte leh a kihel ding mite thumpih in manpha leh gahsuahtak a zoh ahih theihna ding in Pathian makaihna ngetsak ni.

**8 SEPNAWNNI:** April 9-12 sung Khuga Sadar Presbytery, Lingsiphai in Tuailai Camp nei ding a, Evan Upa Lianding Guite thugenpi in pang ding, camp lohching leh gahsuahtak ahihna ding in thumpih ni.



**9 NILAINI:** April 9-13 sung EBCC Mualpi in Hotdamna Camp nei ding a, Evan Upa T Damkhotang thugenpi in pang ding, camp lohching ahihna ding in thumpih ni. April 10-13 EBCC Teikhang in Numei Camp nei ding uh, Rev. Gin Malsawm Principal GBC thugenpi in pang ding, Camp lohchingtak a zoh a hihtheihna ding in thumna ah phawk ni. Aizawl Division Accountant T Nengminlun gari accident ziak a a khuk operation, tua inn a kikem lel hong dam a, Office nasepna hon sutzom baih theihna ding in thumpih ni.

**10 NINGANI:** April 11-13 sung EBCC G Mualkawi in Nungzuihna Chialpi nei ding a, Rev K Kamchinkhup, GS in Pathian thutak gen ding, chialpi lohching ahihna ding in thumna ah phawk ni.

**11 SINTAWPNI:** April 13, Palm Sunday hun ah Rev M Zalian Guite, Director of Ministries in EBCC Zenhang Lamka ah zang in Pathian thutak gen ding, thumna ah phawk ni.

**12 KIGINNI:** April 13 Palm Sunday hun ah Rev N Tuang Lang DS Lamka East in EBCC Jordan ah hunzang ding a, Rev Pumsuanmung Naulak, DS Lamka West in EBCC Bungmual, Evan. N Thangsuanpau in EBCC Zoan, D Phailian leh Rev M Ginminthang, Child Co-ordinator in EBCC College Veng ah hun zang ding uh, thumna ah phawk ni.

**13 NIPINI:** Saptuam chih in Palm Sunday kizang ding, manpha leh lohchingtak a zat ahihna ding in Toupa ompihna leh makaihna ngen in thum ni. Nitak in Mission Motivation hun EBCC Central Lamka ah Rev Thawndoulion, Director of Missions in thugenna hun zang ding, thumna ah phawk ni.

**14 SEPPATNI:** April 14-30 sung BYF Zenhang Lamka in Solfa sinna nei

ding a, Thangbiaklal Valte, Music Promoter in sinsak ding. Lohching leh gahsuh ahihna ding in thumna ah phawk ni.

**15 SEPNAWNNI:** BCD Sinlai Bu project nasepna paizom theizel, tukum in Beginner B kum 2na, Primary kum 3na, Junior kum 3na, Intermediate kum 1na leh Senior kum 1na suahkhiak man dia ngim ahi. Nasepna hoihtak a apaizom theihna ding in thumna ah phawk ni. Dhemaaji Mission Field in April 19-21 sung Nupi Camp nei ding a, Evan Mary Ngaihte leh Evan Vungbiaklun thugenpi hiding. Camp lohching ahihna ding in thumpih ni.

**16 NILAINI:** April 18-20 sung EBCC Hiangtam Lamka in Nungzuihna Chialpi nei ding a, Evan Upa T Damkhotang thugenpi in pang ding. April 18-20 sung EBCC Thanlon in Chialpi nei ding a, Rev K Kamchinkhup, GS thugenpi in pang ding. Hiai hunsung mah in Rev Thawndoulion, Director of Missions in EBCC Bangalore ah Good Friday & Easter Sunday huam in thugen ding, thumna ah phawk ni.

**17 NINGANI:** April 18-20 Good Friday leh Easter Sunday hun ah Rev N Tuanglang in EBCC Phaisan, Evan Upa Lianding Guite in EBCC Khominthang, Rev Khamkhanchin Ngaihte, DS Singngat in EBCC Lungchin leh Rev M Zalian Guite, Director of Ministries in EBCC Tlangnuam ah hun zang ding uh. Good Friday hun ah Rev Pumsuanmung Naulak, DS Lamka West in EBCC Pearsonmun ah hun zang ding a, Evan M Thangminlian in EBCC Elim Veng, Rev Nenglian Vualnam, Director, Development in EBCC Vengnuam, Evan. N Thangsuanpau in EBCC Hermon Khominthang leh Rev. Gin Malsawm, Principal GBC in EBCC College Veng ah hun zang ding, amaute Pathian vualzawlina ngen in thumpih ni.

**18 SINTAWPNI:** Tuni Saptuam chih in Good Friday zang ding, manpha leh lohchingtak a zat ahiehchiat theihna ding in thumna ah phawk ni. # April 19 in Lamka North Division in BCD Sinsaktu Khawmpi nei ding a, Rev M Ginminthang, Child Co-ordinator leh Evan Upa Lianding Guite thugenpi in pang ding uh, thumpih ni.

**19 KIGINNI:** April 20, Easter Sunday ah Rev Pumsuanmung Naulak, DS Lamka West in EBCC New Lane ah thugenna hun zang ding a Rev Nenglian Vualnam, Director, Development in EBCC Pearsonmun ah hun zang ding. Thumna ah phawk ni.

**20 NIPINI:** KTZ Editorial Board in lamzang leh feltak a honsep zomzel theihna ding uleh Article manpha leh khalam a hon chawm ding hoih taktak suahkhiak zel ahihna ding in thum ni.

**21 SEPPATNI:** April 21-25 sung BYF Khominthang in lapawltelak ah chialpi nei ding a, Rev B Chinkhengoupau, Youth Co-ordinator thugenpi in pang ding, thumpih ni.

**22 SEPNAWNNI:** Dhemaji Mission Field in Pathian huhna leh i thumna kigawmkhawmte ziak in masawn mahmah a muh ahi. FS leh a seppihte ziak a kipahtu gen in, thumpih lai ni.

**23 NILAINI:** I Saptuam in Belampu ding Pastor 5 lak i sawm hi. Pathian deihsang mi lakkhak ahihna ding in thum ni.

**24 NINGANI:** April 25-27 sung ZPCS Awnkap Veng in Tuailai Camp nei ding a, Evan Upa Lianding Guite thugenpi in pang ding. Hiai hun toh kituak mah in EBCC Khuangkhai in Hotdamna Chialpi nei ding a, Evan

Upa T Damkhothang thugenpi in pang ding, Rev. Gin Malsawm in EBCC Elim Veng ah Makai Lehleng Camp hun ah thugenpi in pang ding, amaute manpha leh gahsuahtak a a kizat theihna ding un thumna ah phawk ni.

**25 SINTAWPNI:** April 25-27 sung EBCC Chandigarh in Hotdamna Chialpi nei ding a, Evan M Thangminlian thugenpi in pang ding, thumna ah phawk ni. # April 26 in DBYF Lamka North in Seminar nei ding a, Rev B Chinkhengoupau in sinsak ding, Pathian ompihna leh makaihna ngen in thumpih ni.

**26 KIGINNI:** April 26-27 sung EBCC Central Delhi in Saptuam kiphuhkhiak hun zang ding a, Rev M Zalian Guite, Director of Ministries thugentu in pang ding, thumna ah phawk ni.

**27 NIPINI:** Pathian in hunpha hon piak lam-etna toh, Tuailai Khawmpilian nei ding a kisakkholhna kipanta, lamzangtak a vaisai ahihna ding in thumna ah phawk ni.

**28 SEPPATNI:** April 28 apan June kal masa sung EBCC Central Delhi in tutchilh chialpi nei ding ua, Evan. N Thangsuanpau thugenpi in pang ding, manpha leh gahsuahtak a zoh ahieh theihna ding in thumna ah phawkni.

**29 SEPNAWNNI:** I gam dinmunte theikawm in, Pathian buan in, A vualawina ngen in thum lailai ni.

**30 NILAINI:** Division thakten amau division chiat ah nasep hon pan theita uh, kipahtu gen in, Khalam kikepna nnapi a nei a, Pathian deihsang a hon sep zomzel theihna ding un thumna ah phawk ni. ■

FORM IV  
(See Rule 8)

Statement about ownership and other particulars of the Magazine  
“KCHRISTIAN THUKIZAKNA”

1. Place of Publication : New Lamka, Churachandpur,  
Manipur – 795006
2. Periodicity of its publication : Monthly
3. Printer’s name : K. Kamchinkhup  
Nationality : Indian  
Address : New Lamka, Churachandpur,  
Manipur – 795006
4. Publisher’s name : K. Kamchinkhup  
Nationality : Indian  
Address : New Lamka, Churachandpur,  
Manipur – 795006
5. Editor’s name : K. Kamchinkhup  
Nationality : Indian  
Address : New Lamka, Churachandpur,  
Manipur – 795006
6. Name and address of individuals who own the newspaper and partners and shareholders holding more than one percent of the capital : The Evangelical Baptist Convention

I, K. Kamchinkhup, hereby declare that the particulars given above are true to the best of my knowledge and belief.

Dated: New Lamka  
April 01, 2025

  
(K. KAMCHINKHUP)  
Signature of Publisher

---

---

---

**BOOK POST**

Postal Regd. No. MNP 07 | Regd. No. 22344/70

If undelivered, please return to

The Editor,  
**Khristian Thukizakna**  
P.O. Box-6, Dorcas Hall,  
New Lamka-795006, Manipur, India



Edited & Published by Rev. K. Kamchinkhup for the Evangelical Baptist Convention  
Designed and Printed at Convention Book House, Dorcas Hall Campus, New Lamka - 795006